

BAEBELE, BUKA E E GAKGAMATSANG
BAEBELE E ARABA DIPOTSO TSA RONA
MAUNGO A MOWA
GUATEMALA

BASADI

BA

BAPTIST

BASADI BA BAPTIST

**BAEBELE, BUKA E E GAKGAMATSANG
BAEBELE E ARABA DIPOTSO TSA RONA
MAUNGO A MOWA
GUATEMALA**

Africa Coordinated Curriculum for Bible Study

**© International Publications Services all rights reserved
Used by permission**

**Published by
Baptist Publications
P.O. Box 228
Lobatse, Botswana**

DITHULAGANYO TSA BASADI BA BAPTIST

THULAGANYO	TLHOGO	TSEBE
1	Kafa Baebele E Kwadilweng Ka Teng	3
2	Ke Ka Go Reng Baebele E Kwadilwe	8
3	Go Dirisa Dibaebele Tsa Rona	13
4	Go Ithuta Dibaebele Tsa Rona	20
5	A Modimo O Teng Tota?	25
6	Mokeresete Ke Mang?	30
7	Nka Itse Jang Fa Ke Bolokilwe?	35
8	Go Tla Direga Eng Fa Ke Swa?	40
9	A Mokeresete O Ka Ya Kwa Ngakeng Ya Setswana?	45
10	Loungo Lo Lo Golo Ke Lorato	50
11	Go Tsamaya Ka Mowa	55
12	Guatemala	60
13	Guatemala	67

Thulaganyo 1

Tlhogo ya Kabelo ya Ntsha:

BAEBELE, BUKA E E GAKGAMATSANG

Tlhogo ya Gompieno: **KA FA BAEBELE E KWADILWENG KA
TENG**

Temana ya Tlhogo:

"Bojang bo tlo bo omelele, sethunya se swabe: mme lefoko la
Modimo Wa rona le tla ema ka bosakhutleng" (Isaia 40:8).

MOETELEDI-PELE WA THULAGANYO:

Lorato Molefi o ne a tla a tabogile letsatsi lengwe a tswa sekolong.

"Mme," a bitsa.

"Ee, ke fano Lorato," mmagwe a araba.

"Mme, Baebele e farologana jang le dibuka tse dingwe?" Lorato
a botsa. "Baebele e kwadilwe leng? E kwadilwe ke mang? Ke eng
re e ithuta? Baebele ke eng?"

Mmaagwe a araba a re, "Lorato, o itse gore Baebele ke Lefoko la
Modimo. Re ithuta mo Baebeleng se Modimo O ba tlang re se
dira, le gore re ka O latela jang."

"Moruta-bana wa me a re Baebele e tshwana fela le dibuka tse
dingwe," ga bua Lorato. "Fa Baebele e le Lefoko la Modimo, yone
e ne e tswa kae?" Lorato o botsa.

"E ne e tswa kwa Modimong," ga bua mmaagwe.

"Jaanong e ne ya tla jang go tswa kwa Modimong?" Lorato a
botsa. "Ke gore ga ke tlhaloganye," ga bua Lorato.

Mmaagwe o ne a tshwenyega. O ne a sa itse gore o ka araba
jang. A o itse gore Baebele e tswa kae? Go botlhokwa mo go rona
kaga Baebele. Gompieno re tla ithuta gore re bonye jang Baebele
dibeke tse di seng kae tse di tlang, re tla ithuta dikarabo tsa dipotso
ka ga Baebele. Gompieno re tla ithuta gore re bonye jang Baebele
ya rona.

KAROLO YA NTLHA:

Baebele re e filwe ke Modimo. Se re se bolelelwa mo go 2 Timotheo 3:16, "Lokwalo longwe le longwe lo lo kwadilweng ka tlhotlheletso ya Modimo, lo bile lo molemo go ruta, le go kgalemela, le go sokolola, le go kaela tshiamo." Baebele e tswa kwa Modimong. Bogologolo go ise go kwalwe lefoko la ntlha, Modimo Rraarona O ne A loga leano la gore O tla fa bana ba One buka.

A Modimo O ile Wa kwala buka ya One kwa legodimong, mme Wa bo O itlisa kwa go rona e feditswe, jaaka re e bona e simolola ka Genesise go ya kwa go Tshenolo? Nnyaa. Modimo O kabo O dirile selo se, mme O ne Wa tlhopha tsela e nngwe ya go re fa buka ya One, Baebele.

Mo go 2 Petere 1:21, re bolelelwa se, "Gonne ga go polelo-pele epe e e kileng ya tla ka go rata ga motho fela: mme go bua ga batho ga tswa mo Modimong, ka ba tlhodiwa ke Mowa O O Boitshepo." Lefoko lengwe le lengwe la Baebele e ne e le tiro ya batho ba le babedi -- ebong motho le Mowa O O Boitshepo O e leng Modimo.

Bakwadi ba ne ba itse jang se Modimo O neng O batla gore ba se kwale? Mowa O O Boitshepo O ne Wa ba bolelela. Mowa O O Boitshepo O ne O ka ba bolelela jang? Bakwadi ba, e ne e le batho fela ba ba tshwanong le rona. Mme ba ne ba nna gaufi le Modimo, ba batla go itse le go dira thato ya One mo matshelong a bone. Modimo O dirisitse Mowa O O Boitshepo go supetsa banna ba megopolo ya One. Ka jalo ba ne ba kgona go e kwala.

KAROLO YA BOBEDI:

Gompiano fa re leba Dibaebele tsa rona, re bona sekhurumelo se se ntsho se se senang ditsebe tse di gatisitsweng. Baebele e ne e sa nna jaana mo tshimologong. Baebele e ne ya nna le botshelo jo bo gakgamatsang.

Tshimologo ya Baebele e ne e le mo pelong ya ga Jakobe le mo dipelong tsa batho ba ntlha ba Modimo. Fa ba ntse mo magaeng a bone ba ne ba tle ba bolelele bana ba bone dilo tse Modimo O di dirileng. Makgolo a dingwaga a ne a feta.

Ke fa Modimo O bitsa Moshe gore a ntshe bana ba One mo

Egepeto. Modimo O ne Wa naya bana ba Iseraele phenyo gore ba fenyé baba ba bone. Baebele e re bolela mafoko a, mo go Ekesodo 17:14, "Mme Jehofa A raya Mose, A re, 'Kwala se mo lokwalong gore e nne segopodiso...' " Ka jalo Moshe o ne a nna mongwe wa bakwadi ba ntlha ba Baebele.

Modimo O ne Wa kwalela Moshe karolo nngwe ya Baebele e botlhokwa thata. Re bala se mo go Ekesodo 31:18, "Mme e rile A sena go wetsa go bolelelana le Moshe mo thabeng ya Sinai, A mo neela matlapa a mabedi a tshupo, e le matlapa a a kwadilweng ke monwana wa Modimo." Re itse gore e ne e le Melao e e Lesome.

Modimo O ne Wa fa Moshe Lefoko la One. Modimo Wa laola Moshe gore a kwale. Moshe o ne a kwala jaaka a ne a laelwa ke Modimo.

KAROLO YA BORARO:

Modimo O ne Wa bua le balemi-barui le badisa, baperofeti le dikgosi. Ba ne ba O obamela. Bangwe ba bakwadi ba e ne e le Dafide, Isaia, Jeremia le baperofeti ba bangwe.

Moshe o ne a kwalela mo dikwalelong tse di neng di dirilwe ka letsopa le le boleta. O ne a kwala ka letlapana. Ka letsatsi lengwe, mongwe a akanya tsela nngwe e go ka dirwang sengwe se go ka kwalelwang mo go sone. Se se ne sa dirwa ka thito ya setlhare sengwe. Mme morago pampiri e ne ya dirwa ka setlhare sone se.

Pampiri e, e ne ya menwa ka go dikoloswa mo logonyaneng. buka nngwe le nngwe mo Baebeleng e kile ya re nako nngwe ya kwalwa gone jaana. Dipampiri tse di menagantsweng tse, di ne di bidiwa memeno (dikwalo tsa bogologolo tse di neng di mennwe). Mafoko a a mo memenong (dikwalo tsa bogologolo) a Kgolagano e Kgologolo, a ne a kwadilwe ka puo ya Sehebera. Memeno e, e ne ya kwalwa gantsi-ntsi. Lwa bofelo e ne ya kgobokanngwa go dira Kgolagano e Kgologolo.

KAROLO YA BONE:

E rile dikwalo tsa Kgolagano e Kgologolo di sena go nna di kwalwa, Jesu A tla go nna mo lefatshing. O ne a dira dilo tse dintsi tse di gakgamatsang tse di dirileng gore ditsala tsa Gagwe di

di kwale. Banna ba ba nne ba ba kwadileng ka botshelo jwa ga Jesu ke Mathaio, Mareko, Luke le Johane. Dikwalo tsa bone kaga botshelo jwa ga Jesu, ke tsone dikwalo tsa ntlha tse nne tse di mo Kgolaganong e Ntsha.

E rile fa Jesu A sena go boela kwa legodimong, Mowa O O Boitshepo Wa etela Luke, Petere, Paulo le ba bangwe, gore ba kwale ka ga kereke ya ntlha. Dingwe tsa dikwalo tsa bone ke dikwalo tse di neng di kwalelwa Bakeresete ba ntlha. Mowa O O Boitshepo O ne O kaela bakwadi ba. O ne O ba etelela pele go kwala mafoko a Modimo O neng O itse fa a tla thusa Bakeresete. Dibuka le dikwalo tse di neng di kwadilwe ka puo ya Segerika. Di ne tsa nna yone Kgolagano e Ntsha ya rona.

Banna ba Bakeresete ba ba neng ba ineetse, ba ne ba bereka letsatsi le letsatsi go dira Baebele ka seatla. Fa kgatiso ya dikwalo e sena go simololwa, Dibaebele tsa simololwa go gatisiwa. Dibuka tsa Baebele di ne tsa ranolelwa mo puong ya Selatine. Morago di ne tsa ranolelwa mo puong ya Sekgoa, ka jalo batho ba le bantsi ba kgona go di bala. Gompieno re na le Bebele e e kwadilweng ka puo ya rona, le e e kwadilweng ka dipuo tse dingwe. Baebele e ne e dirisang gompieno, ke yone ya ntlha mo dipuong tsotlhe tsa Afrika. Robert Moffat e ne e le morongwa wa Modimo yo o neng a nna le Batswana.

KAROLO YA BOTLHANO:

Batho ba lekile go nyeletsa Baebele, mme ba paletswe. Ba ba kgaatohanong le Modimo, ba lekile go itsa batho go reka le go bala Dibaebele. Ba lekile go itsa go rekwa le go abiwa ga Dibaebele, mme botlhe ba ba paletswe.

Bangwe ba sule ba ntse ba bereka go fa batho botlhe Lefoko la Modimo. Mme Lefoko la Modimo lone le santse le tshela. Dibaebele di rekisiwa go feta buka nngwe le nngwe. Batho ba batla Baebele, ka Baebele ke yone fela buka e e re supetsang tsela e e ya Modimong.

Ruri Baeble ke buka e e gakgamatsang.

MOETELEDI-PELE WA THULAGANYO:

Dipesalema 119:160 tsa re, "...Lefoko la Gago ke boammaaruri..." Temana ya rona ya tlhogo ya gompieno e re bolelela gore Lefoko la Modimo le tla ema ka bosakhutleng.

A re lebogeng Modimo gompieno mo Lefokong la One, ebong Baebele. A re babaleleng Dibaebele tsa rona. A re rapeleng gore re nne le kgololesego ya go ka bala Lefoko la Modimo ka metlha. A re rapeleng gore Modimo O tle O re thuse fa re abelana Lefoko la Gagwe le ba bangwe.

NAKO YA THAPELO:

Rapelelang Bo-mme ba barongwa ba bereka le ditlhopha tsa Basadi ba Baptist mo dikgaolong tsa bone.

KELOTLHOKO:

A lo ipaakanyeditse Letsatsi la Thapelo, 5 Ngwanatsele 1984? Kopa mosadi mongwe le mongwe go rapelela mpho ya gagwe ka letsatsi leo.



Thulaganyo 2

Tlhogo ya Kabelo ya Ntlha:

BAEBELE, BUKA E E GAKGAMATSANG

Tlhogo ya Gompieno: **KE KA GO RENG BAEBELE E
KWADILWE**

Temana ya Tlhogo:

"Mme tse, di kwadilwe gore lo dumele fa Jesu e le Keresete, Morwa Modimo; le gore lo bone botshelo mo leineng la Gagwe ka go dumela" (Johane 20:31).

MOETELEDI-PELE WA THULAGANYO:

Go kile ga bo go le moruti mongwe yo mogolo a bidiwa D. L. Moody. E rile fa a swa, a bua ka lentswe le le tlhatswegileng a re, "Fa e le gore selo se ke loso, ga go na mogogoro, mme se se a galaletsega. Ke ne ke le fa kgorong, mme ke bonye bana. Lefatshe le a nyelela. Legodimo le a atamela! Modimo Oa mpitsa!"

Kwa phitlhong ya ga D. L. Moody, moruti o ne a re, "Ga re a tla fano go lela ka gore re fentswe. Re tsile go ipelela phenyo."

Baebele e kwaletse batho botlhe gore ba e bale, ba bo ba itse tumelo e e tshwanang le ya ga Moruti Moody. Baebele e kwaletse gore e re bontshe sebe sa rona. E kwaletse go re supetsa tsela ya go tshela. E kwaletse go re supetsa gore re ka fenyang jang loso.

Gompieno a re kopeng Modimo go re etelela jaaka re tswelela ka go ithuta Lefoko la One. (Moeteledi-pele o tla re etelela pele mo thapelong, gore gompieno Modimo O re supetse tsela ya go ithuta sentle).

KAROLO YA NTLHA:

Baebele e kwaletse go re supetsa gore re baleofi. Mo Kgologanong e Kgologolo mo lokwalong lwa 2 Ditihalo, kgaolo 34, re bona polelo kaga Kgosi Josia. Josia o ne a nna kgosi nako e Baiseraele ba neng ba le kgakala le Modimo. E ne e le nako e

telele thata fa e sale Lefoko la Modimo le latliwa. Batho ba ne ba obamela medimo ya disetwa, boemong jwa go obamela Modimo.

Josia o ne a batla go direla Modimo. O ne a bitsa banna ba babereki gore ba ntsafatse ntlo ya Modimo. E ne ya re ba ntse ba bereka ba fitlhela Lefoko la Modimo. Ka bofefo, Kgosi Josia a bo a laela gore a balelwe Lefoko la Modimo. A le ne la mo itumedisa? Mo go 2 Ditihalo 34:19 re bona karabo ya potso e, "Mme ga dirafala ya re kgosi e sena go utlwa mafoko a molao, ya ikgagola diaparo." E rile fa a sena go utlwa Lefoko la Modimo a simolola go bona fa a ne a ntse a leofa. O ne a bona bolelo jwa batho ba gagwe. O ne a hutsafalela sebe sa gagwe.

Baebale e re supetsa sebe sa rona. Baroma 3:23 e re bolelela gore, "...gonne botlhe ba leofile, ba tthaetse kgalaletso ya Modimo." Jaaka re senolelwa Modimo mo Lefokong la One, re ipona re le baleofi fa pele ga One. Re bona fa dibe tsa rona di re kgaoganyana le Modimo O O boitshepo.

KAROLO YA BOBEDI:

Baebale e kwaletswe go re supetsa gore re ka ya jang kwa Modimong, lefa re na le dibe. Go tsweng kwa tshimologong ya Baebale go ya kwa bofelong jwa yone, Baebale e re bolelela ka leano lwa Modimo la poloko. E re bolelela kaga lorato lo lo golo lwa Modimo mo go rona. Baroma 5:8 ya re, "Mme Modimo One, O re tlhomamiseditse lorato lwa One, ka e rile re santse re le baleofi, Keresete A re swela."

Modimo O re ratile mo go kalo, mme Wa tlisa Morwa One kwa lefatshing go tla go swa boemong jwa rona, A swela dibe tsa rona. O le molaetsa wa Baebale. O kwadilwe gore re itse tsela ya poloko le botshelo jo bo sa khutleng.

Fa re itse tsela, re tshwanetse go e amogela. E ne ya re fa Kgosi Josia a lemoga sebe sa gagwe, o ne a boela kwa Modimong go kopa boitshwarelo. O ne a solofetsa go latela Modimo. Baebale e re bolelela gore, "Mme kgosi ya ema mo bonnong jwa yona, mme ya dira kgolagano fa pele ga Jehofa, ya re, e tla sala Jehofa morago, e tshegetsa ditaolo tsotlhe tsa Gagwe, ka pelo yotlhe ya yona..." (2 Ditihalo 34:31).

Fa re lemoga sebe sa rona, Baebele e re supetsa tsela ya poloko, ka go ikotlhaela sebe sa rona, le go nna le tumelo mo go Keresete. "Gonne Modimo O ratile lefatshe mo go kalo kalo, Wa ntsha Morwa One yo o tsetsweng a le ese, gore lefa e le mang yo o dumelang mo go Ene a seka a nyelela, mme a bone botshelo jo bo sa khutleng" (Johane 3:16).

KAROLO YA BORARO:

Mo go 2 Timotheo 32:16-17 re bala gore: "Lokwalo longwe le longwe lo lo kwadilweng ka tihotlheletso ya Modimo, lo bile lo molemo go ruta, le go kgalemela le go sokolola le go kaela ka tshiamo: gore motho wa Modimo a tle a nne boitekanelo, a iketleeletse ruri tiro nngwe le nngwe e e molemo." Baebele e kwaletse thuto ya rona. Re tshwanetse go leba mo Baebeleng malatsi otlhe fa re batla ketelelo-pele.

Mosetsanyana mongwe o kile a kwala mafoko a, kaga Baebele ya gagwe, "Fa ke gopola se Baebele ya me e leng sone mo go nna, ke gopola dilo tse dintsi, tse nka e dirisang mo go tsona. Nka e dirisa fa ke le mo matshwenyegong, mo kutlo-botlhokong kana fa ke tihoka kgomotso. Nka ya kwa Baebeleng ya me ye ke dumelang gore e tla nthusana. Nka e bala nako nngwe le nngwe, ka ithuta kaga dilo tse dintsi, ka fa ke tshwanetseng go tshela ka teng."

Mokwadi wa Dipesalema o ne a re, "Lefoko la Gago ke lobone lwa dinao tsa me, le lesedi la tsela ya me" (Dipesalema 119:105). Baebele e tla nna e re supetsa tsela e e siameng ka metlha yotlhe. Mme mongwe o ne a tla kerekeng go bua le moruti kaga ngwana wa gagwe wa ntlha wa mosimane, yo o neng a le mo mathateng. Mosimane yoo le ditsala tsa gagwe, ba ne ba tshwarwa ba santse ba utswa diaparo mo lebentleleng. Mme yo, o ne a gakologelwa nako e setse e ile gore, o kabo a ne a sale a ratile morwawe Lofoko la Modimo, botshelo jotlhe jwa gagwe.

A re tseyeng Lefoko la Modimo jaaka mokaedi wa matshelo a rona. A re ruteng bana ba rona Lefoko la Modimo le go latela tsela ya Baebele.

KAROLO YA BONE:

Lefoko la Modimo le tshwanetse go utlwiwa. Le kwaletswe gore le re ruta, mme le tshwanetse go utlwiwa, gore tumelo ya rona e tle e nne le boikaelelo. Jakobe o ne a kwala a re: "Lo nne badiri ba lefoko, e seng bautlwi fela, lo iphora fela" (Jakobe 1:22).

Lefa re sena go nna Bakeresete, re santse re na le go ithliphela gore a re tla utlwa Lefoko la Modimo kana, nnyaa. Go utlwa Modimo e tlisa botshelo le masego. Go tlhoka go utlwa Modimo go tlisa kutlo-botlhoko, le matshwenyego. Re tshwanetse go utlwa Modimo ka O itse se se re siametseng. Gore re bone botshelo jo bo siameng re tshwanetse go dira thato ya One.

Jesu O ne a re bolelela polelo kaga selo se se ntseng jaana, mo go Mathaio 7:24-27. (Bala ditemana tse, kaga monna yo o botlhale yo o neng a aga ntlo ya gagwe mo lefikeng). Motho yo o utliwang ditaolo tsa ga Jesu o botlhale. Yo o sa utliwang ditaolo tsa ga Jesu ke lesilo.

KAROLO YA BOTLHANO:

Baebele e kwaletswe go re tlisetsa phenyo le masego mo botshelong le mo losong. Go dumela mo go Jesu, ebong go itse ditaolo tsa Gagwe, le go di utlwa, e bile di tlisa masego le boitumelo. Mokwadi wa Dipesalema a re, "Go sego ene yo tlolo ya gagwe e itshwaretsweng, yo boleo jwa gagwe bo bipilweng" (Dipesalema 32:1).

Mo Dipesalemeng go na le ditemana tse di ntle kaga Lefoko la Modimo.

"Molao wa ga Jehofa o itekanetse, o rudisa mowa: tshupo ya ga Jehofa e tlhomamo, e tlhalefisa ba ba sa tlhalefang. Ditao tsa ga Jehofa di siame, di itumedisa pelo: taolo ya ga Jehofa e itshekile, e tsenya matlho lesedi. Poifo ya ga Jehofa e ntle, e nntse ka bosakhutleng: dikatlholo tsa ga Jehofa di boammaaruri, di siame fela gotlhe. Di eletsega bogolo go gouda, Ee, bogolo go gouda e ntsi, e e bontle bogolo: di bile di botshe bogolo go dinotshe le bogolo go lomepa lwa dinotshe" (Dipesalema 19:7-10).

Fa re ka bala Baebele ya rona, ra utlwa dithuto tsa yone, re tla bona boitumelo jo bogolo le thata le masego. Mme e tla re, re tla

kwa bofelong jwa matshelo a rona mo lefatshing, re bue jaaka Paulo re re, "...mme go swa ke phenyo bogolo" (Bafilipi 1:21).

MOETELEDI-PELE WA THULAGANYO:

(Fa basadi nako ya go supa se Baebele e se rayang mo go bone).

NAKO YA THAPELO:

Rapelelang Mme Lillian Jonga, wa Malawi, yo e leng Moeteledi-pele yo Mogolo wa Kopano ya Basadi Ba Baptist Mo Afrika (B.W.U.A.). Kopang Modimo gore O mo etelele pele jaaka a ntse a etela mafatshe a go tshwerweng tiro ya Baptist.

KELOTLHOKO:

Ipaakanyetseng gompiono, go etela basadi ba ba sa tleng kwa setlhopheng sa lona. Ipaakanyetseng go etela basadi ba Baptist ba ba sa tleng kopanong beke le beke. Nnang le nako ya thapelo gore Modimo O lo etelele pele fa le ba etela.



Thulaganyo 3

Tlhogo ya Kabelo ya Ntlha:

BAEBELE, BUKA E E GAKGAMATSANG

Tlhogo ya Gompieno: **GO DIRISA DIBAEBELE TSA RONA**

Temana ya Tlhogo:

"Ke tla ijesa monate mo ditaong tsa gago: ga nkitla ke lebala lefoko la Gago" (Dipesalema 119:16).

MOETELEDI-PELE WA THULAGANYO:

Basetsana ba le ba nne ba ne ba ntse mmogo mo kerekeng, mo mosong wa Tshipi e nngwe. Moruti o ne a re, "Re tla bala Dipesalema 95." Ka bofelo basetsana ba bula Dibaebete tsa bone, ba bona Dipesalema tseo. Monna mongwe yo o neng a ntse mo kerekeng, le ene a tsaya Baebete ya gagwe. O ne a leba Baebete ya gagwe kwa e simololang teng, a boa a e leba kwa e batlileng go felela teng. O ne a phutholola ditsebe tsa yone, mme a seka a bona felo fa go neng go batliwa.

E rile kopano e sena go fela, monna yo a botsa basetsana a re, "Mpolelelang gore lo dirile jang gore lo kgone go bona temana mo Baebeleng ka bofelo? A lo ne lwa tshogana le butse Dibaebete tsa lona felo fa go neng go batliwa?"

"Nnyaa rra," mongwe wa basetsana a bua. "Re ne re itse gore fa re bula fa gare ga Dibaebete tsa rona, re tla bona lokwalo lwa Dipesalema."

"Ee, ke a bona," ga bua monna. "Ke eletsa fa nkabo ke ne ke itse dilo tse. Ga ke a ka ka ithuta kaga Baebete ke sale mosimanyana. Gompieno ke setse ke tsofetse thata."

"Nnyaa, nnyaa, re tla go ruta," ga bua basetsana.

Dibaebete tsa rona ga di na molemo o o kalo fa re sa di dirise. Gompieno re tla ithuta dilo dingwe kaga go dirisa Dibaebete tsa rona.

KAROLO YA NTLHA:

Selo sengwe se se ka re thusang thata fa re dirisa Dibaebele tsa rona ke go ithuta dikwalo tsa Baebele ka go tlhomagana ga tsone. Baebele e na le dikwalo di le 66. Go na le dikwalo di le 39 mo Kgolaganong e Kgologolo, le dikwalo di le 27 mo Kgolaganong e Ntsha. Mo Sekolong sa Tshipi bana ba rona ba ithuta go bua maina a dikwalo tsa Baebele. Mme bangwe ba rona ga ba ise ba ke ba ithute selo se. Ga re a tsofala mo go kalo. Re tshwanetse go di ithuta gompieno.

Ke bomang ba ba fano gompieno ba ba ka buang maina otlhe a dikwalo tse di mo Baebeleng? (Kopa mosadi mongwe go bua maina a dikwalo tsa Kgolaganong e Kgologolo. Kopa yo mongwe mosadi go bua maina a dikwalo tsa Kgolaganong e Ntsha. Fa go sena ope yo o ka dirang selo se, gongwe wena o ka kgona go se dira).

Kwa bofelong jwa thulaganyo e, go na le ditsebe tse di nang le thulaganyo ya dikwalo tsa Baebele. A re lebeng ditsebe tse rotlhe gompieno, re e baleng mmogo. (A basadi botlhe ba bule ditsebe tse ba bale mmogo maina a dikwalo). A re boneng gore ke mang yo o ka ithutang dilo tse mo bekeng e.

KAROLO YA BOBEDI:

Re setse re utlwile gore fa re bula fa gare ga Dibaebele tsa rona, re tla bona lokwalo lwa Dipesalema. Fa re ithuta dikwalo tsotlhe tsa Baebele, re itse gore lokwalo lwa ga Jobe lo tla pele, go tloga fa go tsena Dipesalema. Re tla itse gore lokwalo lwa Diane lo tla morago ga Dipesalema. Ka jalo, re ka bona dikwalo tse.

Re tla itse gore dikwalo tsa baperofeti ba Kgolaganong e Kgologolo di tla morago ga Dipesalema. Re tla itse gore Malaki ke lokwalo lwa bofelo mo Kgolaganong e Kgologolo. Re tla itse gore Genesisise ke lokwalo lwa ntlha. Se ke sone lo bonang re ithuta maina a dikwalo tsa Baebele ka go tlhomagana ga tsone.

Re ka ithuta gape ditsela tse dingwe tsa go batla ditemana mo Baebeleng. A re lekeng. Bulang Dibaebele tsa lona mo go Dipesalema. (Ema go fitlhelela mosadi mongwe le mongwe a bula fa gare ga Baebele ya gagwe, a bona Dipesalema).

Gompieno tsaya bontlha-bongwe jwa Baebele ya gago, jo bo kwa

bofelong, kana tsaya karolo ya Baebele ya gago e e ntlheng ya seatla se se jang. Mme o e bule gape fa gare. Ka go dira jalo, o tshwanetse go bula fa go simololang Kgolagano e Ntsha, kana mo go Mathaio. (A basidi ba leke selo se).

Gompiano o bule fa gare ga bontlha-bongwe jwa Baebele jo bo kwa tshimologong. Mme o tla bona lokwalo lwa ntlha lwa ga Samuele (1 Samuele). (A basadi ba leke selo se gape).

Ka go nna re dirisa Dibaebele tsa rona gantsi, ke gone re ka di ithutang. A re ikaeleleng go ithuta Dibaebele tsa rona ka fa re ka kgonang ka teng.

KAROLO YA BORARO:

Re itse gore Dibaebele tsa rona di kgaogantswe ka dikarolo tse di tona di le pedi. Re itse gore dikarolo tse, ke Kgolagano e Kgologolo le Kgolagano e Ntsha. A o itse gore ke eng di bidiwa ka maina a?

Lefoko le go tweng kgolagano le raya tumalano. Tumalano ke ya batho ba le babedi, kana go feta. Kgolagano e Kgologolo ke tumalano ya Modimo le batho ba One, Jesu a ise a tsalwe.

Kgolagano e Kgologolo e simolola ka polelo ya popo ya lefatshe le popo ya motho. E felela fela pele ga botsalo jwa ga Jesu.

Kgolagano e Ntsha e raya tumalano e ntsha fa gare ga Modimo le motho. Tumalano e ntsha e, e a kgonega ka ntlha ya ga Keresete, Morwa Modimo. Kgolagano e Ntsha e simolola ka dilo tse di amang botsalo jwa ga Jesu. E re bolelela kaga tshimologo ya kereke. E khutla morago ga dingwaga tse di lekgolo.

KAROLO YA BONE:

Dibuka tsotlhe tsa Baebele di kgaogantswe ka dikgaolo le ditemana. Selo se se dira gore go nne motlhofo mo go rona, fa re e bala. Jaaka re ntse re tswelera re ithuta kaga Dibaebele tsa rona, re tla lemoga dilo tse dintsi tse di kgathang.

A o ne o ntse o itse fa Dipesalema e le lone lokwalo lo lo telele mo Baebeleng go feta tse dingwe? Dipesalema e ne e le lokwalo lwa kopelo lwa Bana ba Iseraele. Lefoko "pesalema" le raya "pako" kana "pina ya pako."

Mo Dipesalemeng re bona gape kgaolo e e di fetang tsotlhe mo Baebeleng ka boleele, re bona le kgaolo e e fetwang ke tsotlhe tse di mo Baebeleng. A mongwe o itse gore dikgaolo tse ke dife? (Ema, o bone fa go na le mosadi mongwe yo o ka arabang). Dipesalema 119 ke yone kgaolo e e di fetang tsotlhe mo Baebeleng. Dipesalema 117 ke yone kgaolo e e fetwang ke tsotlhe.

Dikwalo tse nne tsa ntlha mo Kgolaganong e Ntsha di re bolelela kaga botshelo jwa ga Jesu. Dikwalo tse nne tse ke Mathaio, Mareko, Luke le Johane, di bidiwa di-efangele (Mafoko a a Molemo). Lokwalo lwa Ditiro tsa Baaposetoloi lo re bolelela kaga kereke ya ntlha, le jaaka e godileng ka teng. Lo re bolelela polelo ka fa efangele e isitsweng ka teng kwa Baditshabeng. E re bolelela ka barongwa ba Modimo ba ntlha.

Karolo e ntsi ya Kgolagano e Ntsha e bopiwa ke dikwalo tse di neng di kwalelwa Bakeresete ba ntlha. Bontsi jwa dikwalo tse, di kwadilwe ke Paulo. Lokwalo lwa bofelo lwa Baebele ke lwa Tshenolo, lo lo buang kaga polelo-pele. Ke go re le bua kaga dilo tse di tla tlang, mo metlheng e e tlang.

MOETELEDI-PELE WA THULAGANYO:

E kile ya re nako nngwe, mo dingwageng tse dintsi tse di fetileng, bagolwane ba masole a Amerika ba bo ba le mo lefelong lengwe le bidiwa Saint Louis. Ba ne ba gagkamadiwa ke banna ba le ba nne ba ma-India (ma-India a hibidu a Amerika), ba ba neng ba tla kwa go bone. E rile ba goroga fa go bone, ba bo be setse ba lapile thata, e bile ba le leswe.

Bagolwane ba masole ba ne ba gagkamala thata go utlwa fa banna ba ma-India ba ne ba tswa kgaolong e e kwa bophirima, mme ba tsile ka dinao, dimaele di le dikete di le pedi (2,000). Ba ne ba re, "Re tsile go batla buka ya batho-basweu -- Buka ya Botshelo."

Ba ne ba raya Baebele. Ruri, ke yone fela buka mo lefatshing e e re bolelelang gore re ka tshela jang, botshelo jo bo sa khutleng. Ke yone fela buka e e re bolelelang jaaka re ka tsenang kwa legodimong. A go a gagkamatsa, gore banna ba tsamaye sekgala sa dimaele di le dikete di le pedi go batla buka e e buang ka

botshelo jo bo sa khutleng? Baebele ke buka e e tlhokegang.

Lo ke lone lobaka lo lo dirang gore re batle go ithuta Dibaebele tsa rona kafa re ka kgonang ka teng. Ke lone lobaka lo re tshwanetseng go ithuta go dirisa Dibaebele tsa rona. A re lekeng ba rotlhe, mo bekeng e, go ithuta dikwalo tsa Baebele, gore re tle re e dirise botoka. Mo bekeng e e tlang re tla bona gore ke mang yo o tla bolelelang dikwalo tse.

A re lebogeleng Modimo Lefoko la One le tsotlhe tse re ithutileng tsone gompiono.

NAKO YA THAPELO:

Rapelelang Rre le Mme J. H. Williams le bana ba bone ba bararo. Ke barongwa ba Modimo ba basha mo Botswana. Boo-rra Williams ba tla a bo ba ya go dira mo Baptist Publications kwa Lobatse, fa ba sena go fetsa mo sekolong sa go ithuta Setswana.

KELOTLHOKO:

Botsa gore ke basadi ba le kae ba ba neng ba etela ba bangwe mo bekeng e e fetileng? A o na le baeng, ka o ne wa etela bangwe, kana o na le maloko a masha?

DIKWALO TSA BAEBELE

KGOLAGANO E KGOLOGOLO -- 39

MOLAO - 5

Genesis
Ekesodo
Lefitiko
Dipalo
Duteronome

DIPOLELO - 12

Joshue
Baatlhodi
Ruthe
1 Samuele
2 Samuele
1 Dikgosi
2 Dikgosi
1 Ditihalo
2 Ditihalo
Esere
Nehemia
Esethere

PAKO - 5

Jobe
Dipesalema
Diane
Moreri
Sehela sa Dihela (Sefela sa ga Solomone)

BAPEROFETI BA BA TONA - 5

Isaia
Jeremia
Dikhutsafalo
Esekiele
Daniele

BAPEROFETI BA BA BOTLANA - 12

Hosea
Joele
Amose
Obadia
Jona
Mika
Nahume
Habakuke
Sefania
Hagai
Sekaria
Malaki

KGOLAGANO E NTSHA -- 27

BOTSHELO JWA GA JESU KERESETE -4

Mathaio
Mareko
Luke
Johane

POLELO - 1

Ditiro

DIKWALO TSA GA PAULO - 13

Baroma
1 Bakorintha
2 Bakorintha
Bagalatia
Baefesia
Bafilipi
Bakolosa
1 Bathesalonia
2 Bathesalonia
1 Timotheo
2 Timotheo
Tito
Filemone

DIKWALO TSE DINGWE - 8

Bahebera
Jakobe
1 Petere
2 Petere
1 Johane
2 Johane
3 Johane
Jude

POLELELO-PELE - 1

Tshenolo

Thulaganyo 4

Tlhogo ya Kabelo ya Ntlha:

BAEBELE, BUKA E E GAKGAMATSANG

Tlhogo ya Gompieno: **GO ITHUTA DIBAEBELE TSA RONA**

Temana ya Tlhogo:

"Go sego ba ba bolokang ditshupo tsa Gagwe, ba mmatla ka pelo yotlhe" (Dipesalema 119:2).

MOETELEDI-PELE WA THULAGANYO:

Bakeresete ba kile ba bo ba bidiwa "batho ba Buka." Mo mafelong a mangwe batho ba Baptist ba kile ba bo ba bidiwa, "kereke e e nang le Buka." Se se dirwa ke gore molaetsa wa rona le sengwe le sengwe se re se dumelang, le se re se dirang, di tswa mo bukeng e le nngwe-fela, Baebele, Lefoko la Modimo.

A batho ba go bitsa "mosadi wa Buka?" Ba ka nna ba dira jalo fa o le motho yo o balang, yo o ithutang, yo o tshelang ka Baebele. Re tshwanetse go ithuta Dibaebele tsa rona fa re batla go gola jaaka Bakeresete ba ba itseng jaaka Modimo O batlang re tshela ka teng. Gompieno re tla akanya ka ga "GO ITHUTA BAEBELE YA RONA."

KAROLO YA NTLHA:

Ka nako nngwe baperesiti e ne e le bone fela batho ba ba neng ba letlelelwa go bala Baebele. Dibaebele di ne di nna di golegetswe felong ga therelo mo dikerekeng. Di ne di kwadilwe ka puo e e neng e ka balwa ke batho ba se kae fela.

Monna mongwe wa monana yo o neng a bidiwa Martin Luther, o ne a tshwennngwa ke selo se. O ne a simolola go iphitlha mo kerekeng a bala Baebele. Letsatsi lengwe a bala mafoko a a ileng a fetola botshelo jwa gagwe. O ne a bala mafoko a ga Paulo mo Baroma 1:16-17. (Balela basadi ditemana tse mo Baebeleng ya gago).

Rre Luther o ne a rutilwe gore o tla bolokwa ke ditiro tsa gagwe.

Jaanong o ne a bona mo Baebeleng gore poloko e ne e le tumelo mo go Keresete. O ne a bona fa kereke ya gagwe e sa rute ka tsela e e siameng. O ne a sa kake a didimala. O ne a simolola go kwala dipampiri ka se Baebele e neng e se bua. O ne a re batho ba tshwanetse go letlelelwa go bala Baebele gore ba tle ba itse nnete.

Baeteledi-pele ba kereke ba ne ba batla go bolaya rre Luther, mme ditsala tsa gagwe tsa mo fitlha. Ka dingwaga tse di lesome, o ne a bereka go ranolela Baebele mo puong ya ga bone ya Sejere-mane gore batho ba ga bone ba tle ba kgone go iipalela.

Rre Luther o ne a simolola go abela batho Dibaebele. Tsosetso e kgolo e ne ya tla mo bathong, fa ba ne ba simolola go bala Lefoko la Modimo, le go le latela. Gompiano Bakeresete ba itumelela Martin Luther. O ne a le pelokgale. Gompiano re gololesegile go bala Baebele le go itse dithuto tsa yone.

KAROLO YA BOBEDI:

Mo dikerekeng tsa rona re ithuta Baebele. Re tshwanetse go tla le Dibaebele tsa rona nako nngwe le nngwe fa re tla kerekeng. Moruti wa rona o ruta mo Baebeleng. Re tshwanetse go bula Dibaebele tsa rona ra balela mafoko a tsone kwa tlase, jaaka moruti wa rona a tla bo a ntse a re a balela.

Mo Sekolong sa Tshipi re ithuta Baebele. Rotlhe re tshwanetse go nna ditokololo tsa Sekolo sa Tshipi. Re tshwanetse go ithuta dithuto tsa kwa magaeng. Ka go dira jalo re ipaakanyetsa nako ya thuto mo mosong wa Tshipi. Re tla ithuta dilo tse dintsi jaaka re ntse re ithuta le go ipaakanyetsa dithuto tsa Sekolo sa Tshipi. Ka jalo re tla ithuta botoka jaaka re tla bo re ntse re reetsa moruti wa rona mo mosong wa Tshipi.

Mo Basidi ba Baptist re na le dithuto tsa Baebele. Dikereke tse dingwe di na le dinako tsa dikopano tsa dithapelo le thuto ya Baebele fa gare ga beke. Jaaka re tla dikopanong tsotlhe tsa kereke ya rona, re ithuta Lefoko la Modimo. Re gola mo kitsong ya rona ya Baebele. A re nneng boikanngo mo kerekeng ya rona. Re tla nna re ithuta re gola jaaka re ithuta Baebele le Bakeresete ba bangwe.

KAROLO YA BORARO:

Re tshwanetse go ithuta Baebele malatsi otlhe. Fa re ka ja ga nngwe-fela kana gabedi mo bekeng, re tla bolawa ke tlala. Baebele ke dijo tsa rona tsa semowa. Re tshwanetse go e bala letsatsi le letsatsi, fa re batla go gola semowa. Go botoka go leka go nna o rapela le go bala Baebele ya gago ka nako e le nngwe-fela letsatsi le letsatsi.

Batho bangwe ba bula fela Baebele, ba bo ba simolola go bala. Ga se tsela e e siameng e. Selo se se siameng ke go tlhophala lokwalo lo longwe-fela, o bo o bala ditemana di se kae, kana o bala kgaolo nngwe letsatsi le letsatsi go fitlhelela o fetsa lokwalo loo. Ke gone o ka simololang go bala lokwalo lo longwe. Efangele (Mafoko a a Molemo) ya ga Johane, Dipesalema le Ditiro, ke dikwalo tse di siameng thata fa o simolola, fa e le gore ga o ise o ke o bale Baebele thata. Mme mo Baebeleng yotlhe, Modimo O bua le rona.

Bangwe ba re ga ba tlhaloganye Baebele ga ba e bala. Re tshwanetse go rapela jaaka re ntse re ithuta, ra kopa Modimo go re supetsa tlhaloso ya ditemana. Fa tota o batla go bua le Modimo, Mowa O O Boitshepo O tla tsaya Lefoko wa le dira molaetsa wa nnete mo pelong ya gago.

KAROLO YA BONE:

Baebele e bua se ka Lefoko la Modimo: "Gonne Lefoko la Modimo le tshedile, le tlhaga, le bogale go feta ditshaka tsotlhe tse di magale mabedi, mme le tlhabe le ye go kgaoganya pelo le mowa, ditokololo le mooko, mme le bofefo go lemoga megopolo le maikaelelo a pelo" (Bahebera 4:12).

Lefoko la Modimo le bogale jaaka thipa, le tletse nonofo. Le tla re dira gore re bone sebe sa rona. Mme re tshwanetse go ntsha sebe mo matshelong a rona, ka go rata ga rona. Mowa O O Boitshepo O tla re supetsa se re tshwanetseng go se dira jaaka re ithuta Lefoko la Modimo. Ka jalo, re tshwanetse go dira sengwe le sengwe se Modimo O reng re se dire.

Jaaka re ntse re latela dithuto tsa Baebele, re tla tlhaloganya botoko kaga Modimo. Re tla tlhaloganya se O leng sone. Re tla

tlhaloganyana se re tshwanetseng go se dira gore re nne balatedi ba One. Jaaka re tshelela mo boammaaruring jwa Baebele, ke nnete gore e simolola go nna Lefoko la Modimo le le tshedileng mo go rona.

Baebele e tla nna moeteledi-pele wa rona ka metlha mo matshelong a rona. E tla nna lesedi mo ditseleng tsa rona. E tla re dibela mo sebeng.

KAROLO YA BOTLHANO:

Go bua kaga Baebele le go bolelela mongwe kaga Lefoko la Modimo go tla e dira gore e nne nnete e e tletseng. Fa re ntse re bua kaga Baebele le ba bangwe, e tla tlhokega thata mo go rona. Re tshwanetse rotlhe go bala Lefoko la Modimo le ba malwapa a rona malatsi otlhe. Re tshwanetse go ruta bana ba rona go rata le go bala Baebele.

Go na le dibuka dingwe tse di re bolelelang kaga ditemana tse di seng kae, tse re ka di balang letsatsi le letsatsi. Kana re ka bala mo lokwalong longwe lwa Baebele jaaka re tlhola re dirang ka nako ya rona ya thuto ya Baebele fa re le nosi. Re tshwanetse go tlhomamisa go thusa bana ba rona go utlwisisa ditemana tse re di balang.

Re tshwanetse go bua le ba bangwe kaga Baebele. Go siame go ithuta ditemana tsa Baebele ka pelo, jaaka re dira mo ditemaneng tsa rona tsa tlhogo, mo kopanong ya Basadi ba Baptist le mo Sekolong sa Tshipi. Modimo O dirisa ditemana tse re di beileng mo dipedung tsa rona, go bua le rona fa go tlhokega. Gape O re neela dinako tse re ka dirisang ditemana tse re di ithutileng, jaaka re tla bo re bua re supela batho ba bangwe kaga Jesu.

E ka re gongwe ra balela Baebele mongwe yo o tsofetseng, yo o fofetseng, kana ra balela ba ba sa kakeng ba ipalela. Ba le bantsi ba bolailwe ke tlala ya go utlwa Lefoko la Modimo. Re tla segofadiwa jaaka re tla bo re abelana le batho ba.

MOETELEDI-PELE WA THULAGANYO:

Jaaka re gola re rata Baebele thata, re tla rata Jesu thata. Jesu, Ene fela, O fa gare ga Baebele. Molaetsa wa Modimo kwa

mothong ka Baebele, ke Morwawe, Jesu, Mmoloki.

A re ithuteng Lefoko la Modimo. Le tla re dira gore re tshwane thata le Jesu. A re abelaneng Lefoko la Modimo le ba bangwe. Le na le nonofo e kgolo ya go fetola matshele.

(Botsa fa go na le mongwe yo o ithutileng go bua dibuka tsa Baebele jaaka re di ithutile mo bekeng e e fetileng. A botlhe ba ba kgonang, ba di bue ka go tlhomagana ga tsone).

NAKO YA THAPELO:

Rapelelang basadi ba kereke ya Baptist ya Selebi-Phikwe, jaaka ba ntse ba thusa basadi ba Botshabelo go itse kaga tiro ya basadi.

KELOTLHOKO:

Kaela mosadi mongwe le mongwe go dira thulaganyo ya thapelo ya batho ba ba latlhegileng. Gongwe ditokololo tsa Basadi ba Baptist di ka boelelela maina a ditsala tse di latlhegileng, mme ba kope mongwe le mongwe gore a ba rapelele. Mosadi mongwe le mongwe o ka nna a kwala maina ao mo Baebeleng ya gagwe, kana a dirisa pampitshana. Kopa basadi go kopa ketelelo-pele ya Modimo fa ba supela mongwe yo o latlhegileng mo bekeng e e tlang. Dumalanang gore ditokololo di tla rapelelana mo bekeng e. Rapelang gore Modimo O tle O segofatse mongwe le mongwe jaaka a tla bo a batla go supela motho yo mongwe yo o latlhegileng.



Thulaganyo 5

Tlhogo ya Kabelo ya Bobedi:

BAEBELE E ARABA DIPOTSO TSA RONA

Tlhogo ya Gompieno: **A MODIMO O TENG TOTA?**

Temana ya Tlhogo:

"Mme kwa ntle ga tumelo go reteletse ruri go O kгатlha..."

(Bahebera 11:6).

MOETELEDI-PELE WA THULAGANYO:

Batho botlhe ba na le dipotso. Ba e seng Bakeresete, gantsi ba botsa dilo tse dintsi kaga Modimo, kaga Baebele le kaga ditumelo tsa Sekeresete. Satane o leka go raela Bakeresete ka go re dira gore re belaele Modimo le ditsholofetso tsa One. Satane o raetse Efe gone jaana fa a ne a le mo tshimong ga Edena, mme Satane o ne a leofisa Efe.

Mo dibekeng tse di seng kae tse di tlang, re tla leka go batla dikarabo tsa dipotso tse gantsi di dirang batho gore ba belaele. Dikarabo tsa rona di tla tswa mo Baebeleng.

Bangwe ba tle ba re, "Nka itse jang gore tota Modimo O teng? Ga ke O bone. A One O teng tota?" Gompieno re tla akanya kaga dikarabo tsa dipotso tse.

KAROLO YA NTLHA:

(Bala mo Baebeleng ya gago Bahebera 11:1-3 le 6).

Modimo O itsiwe ka tumelo. Ga re kake ra tlhomamisa gore Modimo O teng ka tsela e re ka tlhomamisang dilo tse dingwe. O ka raya tsala ya gago wa re, "Ke na le Pula tse pedi."

Tala ya gago e ka fetola e re, "Nka itse jang fa o na le Pula tse pedi?" Mme fa o tshotse Pula tse pedi ka seatla, o bo o di mmontsha, o tlhomamisa fa o na le madi. Re ka se tlhomamise ka tsela e e ntseng jaana gore Modimo O teng, ka gobo Modimo ke Mowa. Ga re kake ra bona Modimo, lefa e le go O tshwara ka seatla.

O ka raya tsala ya gago wa re, "Ke a go rata." O ka se tseye lorato ka seatla wa le bontsha tsala ya gago. Tsala ya gago e ka se bone lorato lwa gago. O ka se tlhomamise fa o na le lorato jaaka o ka tlhomamisa fa o na le Pula tse pedi. Lefa go ntse jalo, lorato lo teng.

Lefa re sa kake ra bona Modimo, One O teng tota. Baebele e re bolelela gore re ka itse Modimo ka tumelo. Re bala gore, "...Gonne yo o tlang Modimong o na le go dumela fa O leyo, e bile e le Ona Moduedi wa ba ba O batlang" (Bahebera 11:6). Jaaka re dumelang ka teng, re itse fa Modimo O le teng tota. Jaaka tumelo ya rona e ntse e gola, kitso ya rona ya Modimo e a gola le yone.

KAROLO YA BOBEDI:

Dilo tse re di bonang mo tikologong ya rona, di re ruta fa Modimo O le teng tota O O dirileng lefatshe. Fa re leba ntlo, re itse gore ga e a ikaga. Motheo ga o kake wa itira. Ditena, dipati, difensetere, tse tsotlhe ga di kake tsa bona mafelo a tsone ka botlhale jwa tsone. Nnyaa! Fa re bona ntlo, re itse fa go na le moagi yo o e agileng.

Mo go Dipesalema 19:1 re bala mafoko a: "Magodimo a bolela kgalalelo ya Modimo; phuthologo le yona e supa tiro ya diatla tsa Ona." Fa re leba lefatshe le tsotlhe tse di leng mo go lone re itse fa Modimo O le teng, e le One O O logileng maano Wa bo Wa dira tsotlhe. Letsatsi, ngwedi le dinaledi ga di a ka tsa tshogana di le mo loaping. Dithunya le dithhare le diphologolo ga di a ka tsa runya ka tshoganetso. Di dirilwe ke Modimo.

Mme se se gakgamatsang go feta ke mmele wa motho, le ditokololo tsotlhe tsa one. A o kile wa leba losea, wa akanya gore go gakgamatsa jang gore mo mmeleng o monnye oo go tsile go tswa monna kana mosadi? Se ga se a diragala ka phoso. Modimo, Mmopi, O logile leano lwa dilo tse tsotlhe.

Baroma 1:19-20 e re bolelela gore, "Gonne se Modimo O nang le go itsiwe ka sona se a bonala mo go bone; gonne Modimo O se bontshitse. Gonne dilo tse di sa bonaleng tsa Ona, ebong nonofo ya Ona, e e sa khutleng, le bomodimo jwa Ona, di sale di bonala sentle gale mo tlhologang ya lefatshe, ka di lemogwa ka dilo tse di

dirilweng..." Lefatshe lotlhe le le dirilweng ke Modimo le re bontsha gore Modimo O teng tota.

KAROLO YA BORARO:

Ditiro le mafoko a ga Jesu a re bolelela gore Modimo O teng tota. E ne ya re dingwaga tse dintsi pele Jesu A tla, baperofeti ba bua gore Modimo Wa re O tla tlisa Morwa One. Jesu O ne a tla mo lefatshing fela jaaka ba ne ba buile. Baperofeti ba itsile jang kaga Jesu? Modimo O ba boleletse.

Ga go na motho yo o ka dirang ditiro tse dikgolo tsa dikgakgamatso tse di tshwanang le tsa ga Jesu fa A ne a le mo lefatshing. O ne A fodisa ba ba lwalang, A tsosa baswi A kobela badimo ntle. O ne a dira dilo tse ka thata ya Modimo. Jesu O ne a re: "Ntumelang fa ke le mo go Rara, le Rara mo go Nna: mme fa go sa nna jalo, ntumelang ka ntlha ya ditiro fela ka tsosi" (Johane 14:11).

Jesu O tshedile botshelo jo bo senang sebe, mme A swa loso lwa moleofi loso lwa go swela mo Mokgorong. Jesu O ne a bolelela barutwa ba Gagwe fa A tla swa, mme A tsoge gape. Tsogo ya ga Jesu e tlhomamisa gore e ne e se motho fela yo o tshwanang le ba bangwe. Ga go na motho yo o nang le thata ya go tsoga mo baswing. Ke Modimo fela O O nang le thata godimo ga loso le botshelo. Se se dira gore re itse fa Modimo O le teng tota.

KAROLO YA BONE:

Ditirafalo tsa matshelo a rona di re dira gore re itse fa go na le Modimo. Modimo O re dirile, O na le keletso ya gore re O itse. O re neetse maikutlo mo boteng-teng jwa rona, gore re itse fa O le teng tota.

Ke eng se se dirang gore re ipone molato fa re dirile sebe le go itse fa re dirile phoso? Modimo O tsenya kitso e mo dipedung tsa rona. Re boifisiwa ke gore ga re a boloka ditaolo tsa Modimo. Ke gore Modimo O teng tota, mme e re re leofa re tshwarwa ke ditlhong. Re itse fa re tshwanetse go otlhaelwa sebe sa rona.

Batho bangwe ba leka go lebala kaga Modimo. Ba batla go O ntsha mo matshelong a bone, ba seke ba batle go akanya kaga One. Ba ka tshela matshelo a a bosula, ba dira ditiro tse di maswe,

ba tshelela monate kana nonofo ya go laola; mme ba tle bone ka metlha gore ga ba kake ba tswa mo Modimong.

Go tshwana fela le se Baebele e se buang mo go Dipesalema 139:7-10: "Kana ke kabo ke ya kae ke tlogela mowa wa Gago? Kgotsa sebonalo sa Gago nka se tshabela kae. Fa ke tthatlogela kwa legodimong, O bo O le gona: fa ke ala phate ya me bobipong, bona O bo O le gona fela. Fa ke tsaya diphuka tsa ka moso, ke ba ke aga kwa teng teng ga dikhutlo tsa lewatle: le gona seatla sa Gago se tla bo se nkgoga, le seatla se segolo se tla ntshwara."

Gongwe le gongwe kwa re yang teng, re utlwa fa Modimo O le teng. Re itse gore O teng tota.

MOETELEDI-PELE WA THULAGANYO:

Ga re kake ra bona phefo, mme re ka e utlwa mo difatlhogong tsa rona. Re bona dikala tsa setlhare di obega jaaka phefo e ntse e foka re bo re itse fa phefo e le teng.

Go tshwana fela le go itse Modimo. Fa re ikotlhaela dibe tsa rona, re bo re dumela mo go Jesu jaaka Mmoloki wa rona, Mowa O O Boitshepo O tsena mo dipelong tsa rona. O fetola matshelo a rona. O re dira batho ba basha. Re utlwa ditiro tsa Gagwe mo dipelong tsa rona. Re itse ponalo ya Gagwe mo matshelong a rona, ka jalo re itse fa Modimo O le teng tota.

Jesu O ne a raya barutwa ba Gagwe A re, "E tla re kwa pele-nyana, lefatshe le bo le sa tlhole le mpona; mme lona lo bo lo ntse lo mpona: e re ka Ke tshedile, le lona lo tla tshela. E tla re mo letsatsing jeo lo tla itse fa Ke le mo go Rre, le lona mo go Nna, le Nna mo go lona" (Johane 14:19-20).

Gompieno a re bakeng Modimo ka re O itse! A re O lebogeng ka O itshupeditse motho. A re rapeleleng gore matshelo a mongwe le mongwe wa rona a tle a supe fa Modimo O le teng tota.

NAKO YA THAPELO:

Rapelelang basha ba ba amogetseng Keresete jaaka Mmoloki kwa Kopanong ya Botlhe ya Basha. Ba rapeleleng gore ba nne Bakeresete ba ba nonofileng mo dikerekeng tsa bone.

KELOTLHOKO:

A go na le kobamelo ya ba lolwapa mo legaing lwa gago? A wena le ba lolwapa lwa gago lo nne le nako letsatsi le letsatsi ya go bala Baebele, le go rapela le go opela mmogo?

Thulaganyo 6

Tlhogo ya Kabelo ya Bobedi:

BAEBELE E ARABA DIPOTSO TSA RONA

Tlhogo ya Gompieno: **MOKERESETE KE MANG?**

Temana ya Tlhogo:

"Mme ba re, 'Dumela mo go Morena Jesu, mme o tla bolokwa wena le ba ntlo ya gago' " (Ditiro 16:31).

MOETELEDI-PELE WA THULAGANYO:

Moruta-bana mongwe o kile a kopa setlhophapha se a neng a se ruta go kwala dikarabo tsa potso e, "Mokeresete ke mang?" O ne a amogela dikarabo tse di farologanyeng. Bangwe ba ne ba re, "Mokeresete ke leloko la kereke." Bangwe ba ne ba re, "Mokeresete ke motho yo o tsholetswe mo lolwapeng lwa Sekeresete." Bangwe ba ne ba re, "Mokeresete ke motho yo o kolobeditsweng." Bangwe ba ne ba re, "Mokeresete ke motho yo o dumelang mo Modimong."

A dikarabo tsa bone di ne di le boammaaruri? Mokeresete ke mang? Wena o ne o ka e araba jang? Gompieno re tla bona se Baebele e se buang ka potso e.

KAROLO YA NTLHA:

A batho ke Bakeresete ka batsadi ba bone e le Bakeresete? A bana ba rona ke Bakeresete ka re le Bakeresete? Bangwe ba akanya fa ba le Bakeresete ka ba tsholetswe mo lolwapeng lwa Sekeresete. A selo se ke nnete? Nnyaa. Mme jaanong ke eng batho e se Bakeresete fa ba tshotswe ke batsadi ba Bakeresete?

Go na le dilo dingwe tse re di jang boswa mo batsading ba rona. Sengwe sa dilo tse ke boagedi jwa rona. Fa batsadi ba ngwana e le baagi ba lefatshe, ngwana yoo le ene ke moagi wa lefatshe leo fa a tsholwa. Legale selo se ga se boammaaruri mo dilong tsothle. Ngwana ga a tsholwe a rutegile ka batsadi ba gagwe ba rutegile. Ngwana o tshwanetse go tsena sekolo a ithuta.

Se se tshwana fela le go nna Mokeresete. Ga go na ope yo o neng a le Mokeresete fa a tsholwa. Mongwe le mongwe o tshwanetse go ikatlholela gore a o batla go nna Mokeresete, ka gonne mongwe le mongwe ke moleofi. Baebele ya re, "Gonne botlhe ba leofile, ba tlaetse kgalaletso ya Modimo" (Baroma 3:23).

Motho mongwe le mongwe o kgaogana le Modimo ka ntlha ya dibe tsa gagwe. Baebele e re bolelela gore, "Gonne maduo a boleo ke loso..." (Baroma 6:23). "...Mowa o o leofang go tla swa ona" (Esekiele 18:4). Motho mongwe le mongwe o molato fa pele ga Modimo. Motho mongwe le mongwe o tshwanetse go ikarabela. Ga go na mongwe yo o ka mo arabelang.

KAROLO YA BOBEDI:

Mme Mosupi o ne a thusa batho ba bangwe ka metlha. Ka metlha e ne e le ene motho wa ntlha go goroga fa mongwe a tlhokafetse. O ne a le pelontle, a le molemo mo baagisaneng nae. O ne a le bofelo go fa dijo motho yo o bolailweng ke tlala. Mongwe le mongwe o ne a re, "Mme Mosupi ke mosadi yo o molemo thata."

A dilo tsostlhe tse Mme Mosupi a di dirang, di mo dira Mokeresete? A re Bakeresete ka re direla ba bangwe ditiro tse di molemo kana ka gore re utlwa Melao e e Lesome? A re Bakeresete ka re dira ditiro tse dintsi tse di molemo tse di fetang tse di maswe? Batho bangwe ba gopola gore selo se ke nnete, mme ga go a nna jalo. Baebele ya re "Nnyaa."

Ditiro tse di molemo ga di re dire Bakeresete. Re ka tswa re le batho ba ba molemo, mme ditiro tse di molemo ga di na go re isa legodimong. Ga re kake ra dira ditiro tse di lekanyeng tse di molemo tse di phimolang kana tsa bipa sebe se se mo matshelong a rona.

Jesu O kile a bolelela monna mongwe yo o molemo, yo o neng a bidiwa Nikodimo gore o tshwanetse go tsalwa sesha. Ditiro tsotlhe tse di molemo tsa ga Nikodimo di ne di sa kake tsa mo dira Mokeresete. O ne a tlhoka pelo e ntsha le botshelo jo boshia. O ne a tlhoka boitshwarelo jwa dibe tsa gagwe. Botshelo jo boshia bo tla fela fa o na le tumelo mo go Jesu, e seng ka go tshela botshelo jo

bo molemo. Legale, fa re sena go nna Bakeresete, lorato lwa Modimo lo lo mo dipelong tsa rona, le re dira gore re dire ditiro tse di molemo.

Mo go Baefesia 2:8-9, re bala gore, "Gonne lo ntse lo bolokilwe ka tshogofatso ka tumelo; mme le gona go bile go sa tswe mo go lona: mme ke neo ya Modimo. Go sa tswe mo ditirong, gore go se motho ope yo o ipelafatsang."

KAROLO YA BORARO:

"Ke leloko la kereke. A selo se ga se ntire Mokeresete?" "Ke kolobeditse ke sale losea, ka jalo ke Mokeresete." Gantsi re utlwa batho ba bua jalo. A ba bua nnete? A ke Bakeresete ka e le maloko a kereke kgotsa ka ba kolobeditse ba sa le masea? Nnyaa.

Ke eng se se dirang motho gore a nne Mokeresete? Utlwa ditemana tse di tswang mo Lefokong la Modimo. "Ke a lo raya, Nnyaa; mme fa lo sa ikotlhae, le lona lotlhe lo tla nyelela fela jalo" (Luke 13:3). "Mme ba re, 'Dumela mo go Morena Jesu, mme wena o tla bolokwa, wena le ba ntlo ya gago" (Ditiro 16:31).

Motho o nna Mokeresete fa a ikotlhaela dibe tsa gagwe, a bo a dumela mo go Jesu jaaka Mmoloki wa gagwe. Selo se se raya eng? Go ikotlhaya go raya go fetola go akanya ga gago kaga sebe le kaga Modimo. Go tewa go ikutlwela botlhoko ka ntlha ya dibe tsa gago, mme o tlogela dibe tsa gago.

Go dumela mo go Jesu go raya gore o dumela fa Jesu A go swetse mo Mokgorong. Mme ga se go dumela fa Jesu A swetse mo Mokgorong fela, mme go feta moo. O tshwanetse go amogela Jesu jaaka Mmoloki wa gago. O tshwanetse go ineela mo go Ene, gore o tle o bone botshelo jo bo sa khutleng, jo bo fiwang ke Ene.

Johane 3:18 e re bolelela gore, "Yo o dumelang mo go Ene, ga a sekisiwe: yo o sa dumeleng o sekisitse le gompiono, ka a seka a dumela mo leineng la Morwa Modimo yo o tsetsweng a le esi." Go nna leloko la kereke kana go kolobediwa ga go dire motho gore e nne Mokeresete. Fa motho a ikotlhaela sebe sa gagwe a bo a amogela Jesu, o nna Mokeresete. Ga go na motho ope yo o ka nngang Mokeresete fa ese a dirile dilo tse pedi tse.

Baebele e re ruta gore ba e leng Bakeresete, ke bone fela ba ba

ka kolobediwang. Se ke sone se ba kereke ya Baptist ba sa kolobetseng masea. Masea ga a kake a ikotlhaya le go dumela ka bo bone.

KAROLO YA BONE:

A ke boikotlhao le tumelo fela tse di tlhokegang mo botshelong jwa Sekeresete? Ka go ikotlhaya, le go nna le tumelo, re nna Bakeresete -- re bolokilwe. Fa e le go tshela botshelo jwa Sekeresete ke selo se se fetang thata dilo tse. Fa re bolokilwe re tshwanetse go ipolela Keresete mo bathong ba bangwe. Ga re a tshwanela go tlhabiwa ke ditlhong go ema fa pele ga batho, re re, re latela Keresete. (Bala Mathaio 10:32-33).

Tsela e nngwe ya go ipolela Keresete mo go ba bangwe, ke go latela tsela e e neng ya tsewa ke Jesu, ya kolobetso. Kolobetso ga e re dire Bakeresete. Mme motho yo e leng Mokeresete, o tla batla go ipolela mo bathong fa a bolokilwe ka tsela e e ntseng jaana.

Tsela e nngwe ya go ipolela mo lefatsheng fa re le Bakeresete, ke kafa re tshelang ka teng malatsi otlhe. Jesu O ne a re, "Fa lo nthata lo tla tshegetsatsa ditaolo tsa Me" (Johane 14:15).

Ditiro tse di molemo ga di re dire Bakeresete. Lefa go ntse jalo, fa re ntse re le Bakeresete, re tla dira ditiro tse di molemo. Re tla tshela ke tsela e e tla galaletsang Jesu. Re tla utlwa Lefoko la Modimo. Jakobe o kwadile a re, "Gonne jaaka mmele fa o sena mowa o sule, go ntse fela jalo, tumelo fa e tlhalanye le ditiro e sule" (Jakobe 2:26).

MOETELEDI-PELE WA THULAGANYO:

Mokeresete ke mang? (A basadi ba arabe. Tlhomamisa fa basadi botlhe ba tlhologanya fa Mokeresete e le motho yo o ikotlhaetseng sebe sa gagwe, mme a amogela Keresete jaaka Mmoloki wa gagwe).

Gongwe re na le ditsala kgotsa ba losika ba ba dumelang fa ba le Bakeresete ka e le maloko a kereke nngwe, kgotsa ka e le batho ba ba molemo. Re tshwanetse go ba supela kaga tsela e yosi ya poloko. Fa e le gore ga ba ise ba ikotlhave, ba amaogela Jesu, ba latlhegile.

Bontsi jwa rona re bo-mme ba Bakeresete. Re tshwanetse go ruta bana ba rona tsela ya poloko. Re tshwanetse go thusa bana go itse fa ba se Bakeresete ka bo-mmabo e le Bakeresete. Re na le maikarabelo a magolo a go etelela-pele bana ba rona mo go ikamogeleleng Keresete.


Gompiano a re kopeng Modimo go tlisa bao ba latlhegileng kwa go Jesu. Ke Ene fela tsela ya poloko.

NAKO YA THAPELO:

Rapelelang Basadi ba Baptist botlhe mo Botswana. Rapela gore botlhe ba tla kgona go ruta bana ba bone sentle tsela ya poloko.

KELOTLHOKO:

Rulaganya mo Baebeleng ya gago maina a ditemana tse o di ithutileng gompiano. Di tla go thusa go supela batho ba ba latlhegileng.



Thulaganyo 7

Tlhogo ya Kabelo ya Bobedi:

BAEBELE E ARABA DIPOTSO TSA RONA

Tlhogo ya Gompiano: **NKA ITSE JANG FA KE BOLOKILWE?**

Temana ya Tlhogo:

"Mme botlhe ba ba mo tshotseng, a ba naya tshiamelo ya go nna bana ba Modimo, ebong bone ba ba dumetseng mo leineng la Gagwe" (Johane 1:12).

MOETELEDI-PELE WA THULAGANYO:

Ka letsatsi lengwe Mme Boikanyo o ne a tla go buisana le moruti wa gagwe. O ne a tshwenyegile. O ne a re, "E ne ya re fa ke simolola go ikanya Jesu jaaka Mmoloki, ke ne ke tletse boitumelo. Ke ne ke itumetse thata. Mme gompiano ga ke ikutlwe ke itumetse ka tsela eo. Nako nngwe ke tle ke gopole fa ke ise ke bolokwe. Molato ke eng mo go nna? Nka itse jang gore ke bolokilwe kana nnyaa?"

Moruti wa gagwe o ne a re, "Satane o leka thata go dira ngwana wa Modimo gore a belaele fa a bolokilwe. Ka metlha, batho ba le bantsi ga ba tlhaloganye selo se. Rotlhe re ngodiegile ka dinako dingwe. Ga re tlhaloganye dilo tse tsoatlhe, tse di re diragalelang. Ga re nke re ikutlwa jaaka letsatsi lwa ntlha fa re ne re nna Bakeresete. Mme re kgona go itse fa re bolokilwe. Re ka itse gone gompiano, gore re bolokilwe. Re ka itse fa re bolokilwe ka bosakhutleng. Ke tla go bolelela se ke se rayang."

Re tla bona mo thulaganyong ya rona ya gompiano dilo tse Mme Boikanyo a di boleletsweng ke moruti wa gagwe.

KAROLO YA NTLHA:

Mo go 1 Johane 5:13, Baebele ya re, "Dilo tse ke di lo kwaletse, gore lo itse fa lo na le botshelo jo bo sa khutleng, ke raya lona ba lo dumelang mo leineng la Morwa Modimo." Temana e e re bolelela fa go kgonega gore re itse fa re bolokilwe.

Lefoko la Modimo ke boammaaruri. A re bueng re re Johane 3:16. (A basadi botlhe ba bua temana e mmogo). Temana e e re bolelela gore lefa e le mang yo o dumelang mo go Jesu o na le botshelo jo bo sa khutleng. A o dumetse mo go Jesu? Fa e le gore karabo ya gago ke "Ee," itse fela gore o na le botshelo jo ba sa khutleng, ka Baebele ya rona e re bolelela gore lefa e le mang yo o dumelang mo go Jesu, o na le botshelo jo bo sa khutleng. Baebele ga e re, "Gongwe o na le botshelo jo bo sa khutleng." Ke lobaka lo lo tlhomamisegang le gore lefa e le mang yo o dumelang tota mo go Jesu, o na le botshelo jo bo sa khutleng.

O ka re o akanya wa re, "Mme ke tla itse jang fa ke dumetse tota?" Jesu O ne a re, "...yo o tlang mo go Nna, ga nkitla ke mo kgoromeletsa ntle gope" (Johane 6:37). A o tsile kwa go Jesu? Fa o tsile kwa go Ene, Jesu O ne a re ga a na go go kgoromeletsa ntle. Fa A sa go kgoromeletsa ntle go raya gore O go amogetse. Ka gonne Lefoko la Modimo ke nnete, re ka itse fa re bolokilwe.

KAROLO YA BOBEDI:

Johane wa Ntlha 4:13 e re bolelela gore, "Mme re a itse fa re nnetse ruri mo go Ona le Ona mo go rona, ka gona moo, ka O re abetse Mowa wa Ona" (1 Johane 4:13). Tsela e nngwe e re ka itseng fa re bolokilwe, ke ka go bo Mowa O O Boitshepo le teng mo dipelong tsa rona. Mowa O O Boitshepo O re tlhomamisetsa fa re le batho ba ga Jesu.

Gongwe re gakgamala gore re ka tlhomamisa jang fa Mowa O O Boitshepo O le mo dipelong tsa rona. Baebele e re bolelela kaga dilo tse dintsi tse Mowa O O Boitshepo O di dirang mo dipelong tsa rona. Mowa O O Boitshepo O re ruta ditsela tsa Modimo. O re naya nonofo ya go dira thato ya Modimo. Mowa O O Boitshepo O leka go re dira gore re tshwane le Jesu. Fa re bona dilo tse di diragala mo dipelong tsa rona, re itse fa Mowa O O Boitshepo O dira tiro ya One.

Mowa O O Boitshepo O re dira gore re itse thata kaga sebe se se mo matshelong a rona. O re bontsha sebe sa rona. O re atholela sebe se re sa se ipolelang. Mowa O O Boitshepo O re dira gore re rate dilo tsa Modimo, lefa nako nngwe re kile ra rata dilo tsa

lefatshe.

Go nna teng ga Mowa O O Boitshepo mo dipelong tsa rona go re tlhomamisetša poloko ya rona.

KAROLO YA BORARO:

Go raelesega, le sebe se se mo matshelong a rona, di dira gore nako nngwe re belaele poloko ya rona. Satane o kile a raela Jesu, mme a re se gakgamaleng fa re raelesega go dira bosula. Jesu ga A ka a leofa, mme rona re a leofa. Ka jalo, re ka nna ra gakgamala, fa tota re bolokilwe.

Fa Mokeresete a leofa, a go raya gore o latlhegile gape? Nnyaa! Mo go Johane 10:27-28 Jesu O ne a re, "Dinku tsa Me di utlwa lentswe la Me, mme Ke a di itse, mme di ntshale morago: mme Ke di naya botshelo jo bo sa khutleng; mme ga di kitla di nyelela gope, e bile ga go ope yo o nonofileng go di phamola mo seatleng sa Me." Satane o ka re raela, a re leofisa, mme ga a kake a re phamola mo seatleng sa Rra-rona. Jesu O neile botlhe ba ba dumelang mo go Ene botshelo jo bo sa khutleng.

Baebele ya re re bana ba Modimo fa re dumela mo go Jesu jaaka Mmoloki wa rona. A re bueng gape temana ya rona ya tlhogo. (A basadi botlhe ba bua nako e le nngwe ba re Johane 1: 12).

Fa bana ba sa go utlwa, a e ntse ke ba gago? Ee, e ntse ke ba gago, ka ke wena o ba tshotseng. Lefa ba sa go utlwa ga go na sepe se se ka fetolang botsalo jwa bone. A re ntse re bana ba Modimo fa re sa O utlwe? Ee, re santse re le bana ba Modimo. Modimo Oa re dibela, ga go na sepe se se ka re kgaoganyang le lorato lwa One. Ga go na sepe se se ka re tsayang mo go One.

KAROLO YA BONE:

Ke eng se Mokeresete a tshwanetseng go se dira, fa a leofa? Re bolelelwa mo go 1 Johane 1:9 gore, "Fa re ipolela dibe tsa rona, Ona O boikanngo le tshiamo ya go itshwarela dibe tsa rona, le go re tlhapisa mo tshiamololong yolthe." Rara Yo O kwa legodimong Yo O rategang, O re itshwarela dibe tsa rona fa re di ipolela mo go Ene. Fa re simolola go lemoga fa re leofile, re tshwanetse go

ipolela sebe sa rona mo Modimong gore re amogele boitshwarelo jwa One.

Nako nngwe Bakeresete ba bona go le thata go dumela fa Modimo O ba itshwaretse tota. Nako nngwe go thata gore re iitshwarele fa re dirile bosula. Ka ntlha ya go ipona molato ga rona, re gopola fa Modimo O seke O re itshwarela. Mme re tshwanetse go utlwa Lentswe la Gagwe. Oa re itshwarela fa re ipolela dibe tsa rona.

Baebele e bua jaana gape e re, "Jaaka botlhabatsatsi bo le kgakala le bophirimatsatsi, le Ena O re tloseditse ditlolo tsa rona bokgakala jo bo kalo" (Dipesalema 103:12). Modimo Oa re itshwarela. O bo O tlose dibe tsa rona, kgakala le rona.

KAROLO YA BOTLHANO:

Mo go 2 Bakorintha 5:17 Baebele ya re, "Mme ke gona, fa motho a le mo go Keresete, o a bo a le sebopiwa se sesha: dilo tsa bogologolo di fetile; bonang, di ntse di ntsha." Re ka itse fa re bolokilwe ka ntlha ya phetogo e e tlang mo dipelong tsa rona. Fa re bolokilwe re nna batho ba basha. Re batla go tlogela ditsela tsa sebe. Re batla go tsamaya mo thatong ya Modimo.

Gore re kgone go dira selo se, re tshwanetse go nna gaufi le Jesu ka metlha. Re nna gaufi le Jesu ka go rapela le go bala Dibaebele tsa rona malatsi otlhe. Lefoko la Modimo le tla re dibela mo sebeng. Dipesalema 119:11 e re bolelela gore, "Ke beile Lefoko la Gago mo pelong ya me, gore ke seka ka Go leofela."

Jaaka re nna gaufi le Jesu jaana, re tla nna le tlhomamiso e e tletseng mo dipelong tsa rona fa re bolokilwe tota.

MOETELEDI-PELE WA THULAGANYO:

A o tsile kwa go Jesu, go ikotlhaela sebe sa gago le go Mo amogela ka tumelo? Fa go ntse jalo o ka nna wa re, "Gompieno ke itse fa ke bolokilwe. Ke itse fa ke santse ke tla bolokwa le ka moso. Ke itse fa ke bolokilwe ka bosakhutleng." Re ka bua selo se ka ntlha ya gore Modimo O boikanngo e seng ka ntlha ya ditiro tse re di dirileng.

"...O nonofile go bolokela ruri ba ba atamelang Modimo ka Ena,

ka A ntse A tshedile ka metlha yotlhe go ba rapelela" (Bahebera 7:25).

Gompieno a re bakeng Modimo ka ntlha ya poloko ya Ona e e gakgamatsang.

NAKO YA THAPELO:

KELOTLHOKO:

Mo dibekeng tse dintsi re ntse re akanya kaga Baebele. Re ithutile kafa Baebele e kwadilweng ka teng le gore ke eng e ne ya kwalwa. Gompieno re lemoga fa Baebele e araba dipotso tse dingwe tse di bothokwa. Kopa mosadi mongwe le mongwe gore a bale Baebele ya gagwe malatsi otlhe, a bo a loge leano la go abelana le sethlopha, ka fa Modimo O buileng le ene ka Lefoko la One.



Thulaganyo 8

Thogo ya Kabelo ya Bobedi:

BAEBELE E ARABA DIPOTSO TSA RONA

Thogo ya Gompieno: **GO TLA DIREGA ENG FA KE SWA?**

Temana ya Thogo:

"Jesu A mo raya A re, 'Ke nna tsogo le botshelo; yo o dumelang mo go Nna, lefa a swa lefa go ntse jalo o tla tshela' "

(Johane 11:25).

MOETELEDI-PELE WA THULAGANYO:

Go nna jang mo go nna fa ke swa? Potso e, e boditswe ke batho ba ba tshedileng mo dipakeng tse di farologanyeng. Lefa re itse fa batho botlhe ba tla swa, go na le poifo e kgolo ya loso. Poifo ya rona ya loso e tlisiwa ke gore ga re itse se se tlang morago ga loso. Ga re itse gore ke eng se se mo lotlhakoring lo longwe lwa loso.

Baebele e araba dipotso tsa rona kaga loso. Baebele e re bolelela fa loso e se bokhutlo. Baebele e re bolelela fa Bakeresete ba fenywa loso ka gore Jesu O ne a le fenywa. Jesu Oa tshela gompieno. Bakeresete ba itse fa loso e le tsela e e isang botshe-long -- botshelo jo ba tla bo tshelang le Jesu ka bosakhutleng kwa legodimong.

Gompieno re tla ithuta se Baebele e se buang kaga loso.

KAROLO YA NTLHA:

Loso lwa senama lo tlela botlhe. Loso lwa senama ke eng? Ke loso lwa mmele. Motho oa bo a sule fa mmele wa gagwe o ema go bereka. Pelo e ema go itaya. Makgwafo a sa kgone go tlisa phefo mo mmeleng. Seatla se a bo se le teng, mme ga se kake sa tshwara sepe. Ditsebe di a bo di sa kgone go utlwa. Matlho a sa tlhole a bona.

Fa mmele o o swa, mowa o tlogela mmele, mme mmele o simolole go bola. E tla re morago ga sebaka se se rileng, mmele o

boele gape kwa mmung kwa o tlhologileng teng. Loso lwa senama lo tlisiwa ke sebe.

E rile fa Adame a sena go leofa, fa a ne a le mo Tshimong ya Edena, Modimo O ne Wa mo raya Wa re, "O tla ja dijo ka mofufutso wa sefathogo sa gago, o bo o tle o tsamaye o boela mo mmung; gonne o ntshitswe mo go ona; gonne o lorole, mme o tla boela mo loroleng" (Genesis 3:19).

Bangwe ba tle ba re loso ke jone bokhutlo, mme ga se nnete. Ba ba nang le tumelo mo go Keresete, ba bo ba dumela Lefoko la Modimo, ba itse fa loso e se bokhutlo. Re itse fa go na le botshelo morago ga loso. Jesu O ne a re, "Mme lefa e le mang yo o tshelang a dumela mo go Nna, ga a kitla a swa gope" (Johane 11:26).

Mo kgaolong 11 ya Efangele ya ga Johane re bolelelwa polelo e e gakgamatsang, kafa Jesu A tsositseng ka teng Lasaro mo losong. (Bala mo go Johane 11:1-44 polelo e kwa lwapeng lwa gago. Bolelela basadi kaga go tsosiwa ga ga Lasaro).

KAROLO YA BOBEDI:

Ke eng se se diragalelang mowa, fa mmele o sena go swa. Mowa o sala o tshela mo popegong ya semowa. Mowa oa tshela. Mowa o na le sebopego sa one fela jaaka o ne o santse o le mo mmeleng.

A re baleng Luke 16:19-31. (O tshwanetse wa bala ditemana tse kwa lwapeng lwa gago, mme o tla di tlhologanya. Di balele basadi gone gompiano jaana, kana kopa mongwe yo o ka balang sentle, go di bala gompiano).

Mowa wa monna yo o humileng, yo o neng a sa ikotlhaya, e bile a sa dumele mo Modimong, o ne wa ya kwa Moleteng. Mowa wa ga Lasaro, yo o neng a dumela mo Modimong, o ne wa tsewa ke bangele ba o isa kwa sehubeng sa ga Aberahame.

Mewa ya ditsala tsa rona le ba masika a rona a a suleng, ga e a totomala fela mo mabitleng. Bao ba amogetseng Jesu jaaka Mmoloki wa bone, ba nna le Modimo. Jesu One A ba naya botshelo jo bo sa khutleng, go simolola fela ka nako e ba neng ba simolola go Mo amogela jaaka Morena le Mmoloki wa bone. A o itse gore Jesu O ne a raya legodu le le neng la ikotlhaya, fa le ne le mo mokgorong a reng? O ne A re, "O tla nna le Nna kwa Paradaisa

gompieno" (Luke 23:43).

KAROLO YA BORARO:

Ka nako ya loso lwa senama, mmele o fitlhwa mo mmung. Mmele o mogologolo o, ga o na go tshela gape, mme e tla re ka letsatsi lengwe, mo boemong jwa one, o tla nna le mmele wa semowa. Se se tla diragala nako e Jesu O tla bong a boela lefatsheng. A re bone se Paulo o neng a se bua kaga selo se. "Mme foo go tla bokhutlo, jo o tla neelang Modimo, e bong bogosi ka jona, a sena go nyeletsa puso yotlhe, le taolo, le nonofo. Gonne O na le go busa fela, a bo a tle A tsamaye A beye baba botlhe ba Gagwe fa tlase ga dinao tsa Gagwe. Mmaba wa bofelo yo o tla nyelediwang ke loso" (1 Bakorintha 15:24-26).

E tla re ka nako e, mewa e tla bo e apere mebele e mesha. Mme o moshwa o, o tla bo o sa tshwane le o mogologolo, lefa go ntse jalo, o tla bo o tshwana le o mogologolo ka nngwe tsela. Paulo a re go tshwana le o jala peo, ka gonne peo e e jadilweng e a swa, mme fa go yone go mele setlhare se sesha, se se tshwanang nayo.

Ga re tihaloganye sengwe le sengwe kaga mebele e mesha e, mme Baebele e re bolelela dilo dingwe kaga yone. (Bala kwa lwapeng 1 Bakorintha 15:42-50 gore o tle o tihaloganye). Mebele ya rona e mesha ga e na go lwala. Ga e na go swa. Legale e tla bo e tshwana fela le mebele ya rona e megologolo, gore re tle re lemogane.

E rile fa Jesu A sena go tsoga, barutwa ba Gagwe ba Mo lemoga. Ba ne ba bona le dipadi tsa dimapo mo diatleng tsa Gagwe. Lefa go ntse jalo O ne a le mo mmeleng wa semowa. O ne a tsena lefa mojako o ne o tswetswe. Mebele ya rona e mesha e tla bo e le ya semowa.

KAROLO YA BONE:

Morago ga tsogo ya baswi go tla tla katlholo ya bofelo. Jesu O tla bo e le moatlhodi. Motho mongwe le mongwe o tla atholwa go lebilwe dilo tse pedi tse: gore o tsalana jang le Modimo, le gore o tsalana jang le batho ka ene.

Bao ba amogetseng loso lwa ga Jesu mo mokgorong jaaka

tetlanyo ya dibe tsa bone, ba tla amogelwa ke Modimo. Se se tla bong se ba letile ke botshelo jo bo sa khutleng, kagiso le boitumelo kwa legodimong le Modimo.

Bao ba ganneng go amogela Keresete jaaka Mmoloki ba tla belega maduo a dibe tsa bone. Baebele ya re, "Gonne maduo a boleo ke loso..." (Baroma 6:23). Bao ba ganneng Keresete mo lefatshing, ba tla bona katlholo ya pogisego e e sa feleng mo moleteng. Ba tla nna ba kgaoganye le Modimo le tsotlhe tse di molemo ka bosakhutleng.

Fa o ikotlaetse dibe tsa gago e bile o ikanya Jesu jaaka Mmoloki wa gago, o itse fela fa o na le botshelo jo bo sa khutleng. O tla ya legodimong. Mme ga se Bakeresete botlhe, ba ba tla amogelang maduo a a lekanang kwa legodimong. Maduo a mongwe le mongwe a laolwa ke ditiro tsa gagwe mo lefatsheng, mme a tla laolwa gape ke go tshela ga gagwe a ikanya Keresete le go utlwa ditaolo tsa Gagwe.

Lefa go ntse jalo, batho botlhe ga ba na go atholwa mo go tshwanang. Ba ba utlwiweng Efangele (Mafoko a a Molemo) gantsi-ntsi mme ba tswelela ka go gana go amogela Jesu, ba tla otlhaiwa katlholo e e botlhoko go feta bao ba e seng ba ke ba utlwe Lefoko la Modimo gope.

KAROLO YA BOTLHANO:

Mo lokwalong lwa Tshenolo, Johane o ne a leba kwa legodimong mme a bona ba ba bolokilweng a ba utlwa ba baka Morena. Mo go Tshenolo 7:9-10 Johane o ne a re, "Morago ga dilo tse ka leba, mme bonang, boidiidi jo bogolo jwa batho, jo go seng motho ope yo o ka bo balang, e le ba morafe mongwe le mongwe, le ba ditso tsotlhe, le batho, le dipuo, ba eme fa pele ga setilo sa bogosi, le fa pele ga Kwana, ba apere dikobo tse di tshweu, mme ba tshotse makolane ka diatla; mme ba thela loshalaba lo logolo ba re, 'Poloka e nne go Modimo wa rona O O dutseng mo setilong sa bogosi le go Kwana.' "

Mo legodimong, Johane o ne a bona ba ba bolokilweng ba ne ba le bangwe-fela mo go Keresete. Ba ne ba apere dikobo tse di tshweu tsa phenyo, ba opelela Morena dipako. Johane o ne a re,

"Ke gona kafa ba leng fa pele ga setilo sa bogosi sa Modimo ka gona; mme ba O direla motshegare le bosigo mo tempeleng ya Ona: mme Yo O dutseng mo setilong sa bogosi O tla tsharolola motlaagana wa Gagwe godimo ga bone. Ga ba kitla ba tlhola ba bolawa ke tlala gope, lefa e le lenyora: letsatsi ga le kitla le ba babalela, lefa e le mogote ope: Gonne Kwana Yo O fa gare ga setilo sa bogosi O tla nna modisa wa bone, mme O tla ba gogela kwa metsweding ya metse a botshelo: mme Modimo O tla phimola dikeledi tsothe mo matlhong a bone" (Tshenolo 7:15-17).

Legodimo ke lefelo le le gakgamatsang. A re se tshabeng loso fa re le batho ba ga Jesu, ka gonne re tla nna kwa legodimong le Morena wa rona ka bosakhutleng.

MOETELEDI-PELE WA THULAGANYO:

Fa re bolokilwe, botshelo jo bo sa khutleng ke tshwanelo ya rona gompiano. Ga re a tshwanela go tshaba loso. Paulo o ne a kwala jaana mo go Bafilipi 1:21, "Gonne mo go nna, go tshela ke Keresete mme go swa ke phenyo bogolo." A re itumeleng gompiano gonne Jesu Oa tshela ka jalo re na le phenyo ya loso. "Go swa ke phenyo bogolo."

A re lebogeng Modimo ka go re naya mpho ya Morwa Ona. A re lebogeleng tlhomamiso ya botshelo jo bo sa khutleng.

NAKO YA THAPELO:

KELOTLHOKO:

Loga leano la go etela mongwe mo bekeng e. Gongwe basadi ba le babedi ba ka etela motho mongwe mmogo. Etela mongwe yo o lwalang. Etela mongwe mo kokelong. Etela mongwe yo o kgelogileng. Etela mongwe yo e seng Mokeresete. O rapele gore Modimo O go etelele-pele kwa bathong ba o tla ba etelang. O rapele gore o nne le nonofo ya Mowa O O Boitshepo ya go supa.

Thulaganyo 9

Tlhogo ya Kabelo ya Bobedi:

BAEBELE E ARABA DIPOTSO TSA RONA

Tlhogo ya Gompieno: **A MOKERSETE O KA YA KWA
NGAKENG YA SETSWANA?**

Temana ya Tlhogo:

"Se fapogeleng kwa go bone ba ba buang le badimo, lefa e le
kwa go bone ba ba loang; lo se ka lwa ba batla, go tla lo
itshekololwa ke bone: ke nna Jehofa Modimo wa lona"
(Lefitiko 19:31).

MOETELEDI-PELE WA THULAGANYO:

Potso e bontsi jwa rona re e botsang ke, "A Mokeresete o ka ya
ngakeng ya setswana?" Gompieno re tla akanya kafa re ka
arabang potso e.

A re akanyeng kaga dingaka tsa setswana tse re sa bolong go di
itse, kana a re akanyeng kaga dingaka tse ba malwapa a rona kana
ditsala tsa rona di kileng tsa ya kwa go tsone. A o itse mongwe yo
o kileng a tsiediwa ke dingaka tse? A o itse mongwe yo o kileng a
bolawa ke melemo ya tsone? A o itse mongwe yo o kileng a duela
bone batho ba ba ipitsang dingaka tsa setswana, madi a mantsi?

Ke eng se Modimo O se buang kaga boloi?

KAROLO YA NTLHA:

Fa motho a ya kwa ngakeng ya setswana, ngaka e tshwanetse go
bua le mewa ya batho ba ba suleng. Motho yo o yang kwa ngakeng
ya setswana, o tshwanetse go e duela sengwe se se tla e itumedi-
sang. Nako nngwe ngaka e lopa madi a mantsi tota, gongwe kgomo
kgotsa podi. Gantsi ngaka e, e laela batho go dira setlhabelo go
didimatsa mewa ya bo-rra bone ba ba galefileng. Batho ba dira se
ngaka ya setswana e reng ba se dire ka ba boifa.

Ngaka ya setswana e dirisa poifo yone e go tsietsa batho gore ba
mo ikanye. Re bala Lefoko la Modimo mo go 2 Timotheo 1:7 le re,

"Gonne Modimo ga Wa ka Wa re naya mmowa wa bogatlapa, fa e se wa nonofo le wa lorato le wa mogopolo o o tlhomameng fela." Re ka bona gone mo temaneng e gore nako nngwe le nngwe e re tshabang motho, poifo e e a bo e tswa mo go Satane. Modimo ga O re neye mowa wa poifo.

Fa re le batho ba ga Keresete, ngaka ya setswana ga e na nonofo epe mo go rona. Modimo O re file mowa wa nonofo. Nonofo ya Modimo e feta nonofo ya ga Satane. Lefa go ntse jalo, fa e le gore ga re bana tota ba Modimo, ngaka ya setswana e tla kgona go re tsietseng.

KAROLO YA BOBEDI:

Mo ngwaong ya rona, mo dingwageng tse dintsi tse di fetileng, batho ba ne ba dumela fa malwetse le matshwenyego di ne di tlisiwa ke mewa e e maswe, kana medimo e e neng e shakgetse ya malwapa, e e neng e tlogetse go sireletsa batho ba lolwapa lo lo rileng. Phahamogo, go ruruga maoto, le bolwetse bongwe le bongwe fela jo bo neng bo ka dira motho gore a bopame, go ne go dumelwa fa bo tsisiwa ke boloi.

Mo malatsing a gompiano, dingaka tsa sekgoa di setse di ithutile fa diboko, monang, ditwatsi le go tlhoka go ja sentle, le tse dingwe tse dintsi e le tsone tse di tlisang malwetse. Dingaka tsa sekgoa le baoki ba ithutile mmele wa motho gore ba bone se se tlisang malwetse. Ba setse ba ithutile kafa malwetse a ka alafiwang ka teng. Bakeresete ba tshwanetse go ya kwa dingakeng tsa sekgoa le baoki, batho ba e leng gore ba ithutile go alafa malwetse. Modimo O ba thusitse go ithuta tsela e e siameng thata ya go alafa batho ba ba lwalang.

Modimo O ila boloi. E ne ya re kwa tshimologong Modimo Wa itsa batho ba One go nna ba ya kwa bathong ba ba ntseng jalo. Lefoko la Modimo le phepha fa le re, "Go seka go fitlhelwa mo go wena ope yo o ralatsang morwawe kgotsa morwadie molelo, lefa e le mongwe wa moitsenape, lefa e le mongwe yo o swabang ka eng le eng, lefa e le morai, kgotsa yo o loang. Lefa e le mophekodi, kgotsa yo o buang le badimo, kgotsa ngaka ya bola, kgotsa yo o botsang baswi. Gonne lefa e le mang yo o dirang dilo tse, o

makgapha mo go Jehofa..." (Duteronome 18:10-12).

KAROLO YA BORARO:

Batho bangwe ba re ga ba bone phoso epe fa ba ya kwa ngakeng ya setswana. Ba re dingaka tsa setswana di ka thusa go fodisa malwetse. Nako nngwe dingaka tsa setswana di ka fodisa, ka gone gantsi o fitlhela di na le kitso ya melemo e e ka thusang mo go fodiseng malwetse mangwe. Bontsi jwa melemo e e dirisiwang ke ngaka, e fitlhelwa mo dikokelong e fiwa batho ke dingaka tsa sekgoa.

Fa go ntse jalo, ke eng se se sa siamang fa motho a ya kwa ngakeng ya setswana? Dingaka tsa setswana tsa re di tsaya thata ya tsone ya go fodisa malwetse mo meweng ya batho ba ba suleng. Gape di a ikgalaletsa. Gantsi dingaka di rata go tshosa balwetse ba tsone gore di tla ba direla kotsi ka ditlhare fa ba sa di duele.

Tumelo ya ngaka ya setswana mo boloing, e e dira gore e nne motho yo o diphatsa. O dirisa dilo dingwe gape mo melemong ya gagwe, ka jalo ke motho yo o diphatsa. Mosimanyana mongwe o ne a lwetse ka sebaka, mme ba lolwapa lwa ga bone, ba mo tsaya ba mo isa ngakeng ya setswana. Ngaka ya setswana ya bo e fitla e mo tlhaba ditlhabo, e bo e mo fa molemo, ya bo e mmusetse kwa legaeng lwa gagwe. Mosimane o ne a idibala. Mme morago batsadi ba gagwe ba ne ba mo isa kokelong. Ngaka ya sekgoa ya lemoga fa a idibaditswe ke molemo wa ngaka ya setswana, o o neng o fetile selekanyo. Mosimane o ne a tshwerwe ke bolwetse jwa letshoroma. Ngaka ya sekgoa e kabo e mo alafile fa a kabo a ne a seka a nwa molemo o o ileng wa mmolaya o o neng o fetile selekanyo wa ngaka ya setswana.

Temana ya rona ya tlhogo e re tlhagisa gore re seka ra ya go kopa thuso kwa dingakeng tsa setswana. "Se fapogeleng kwa go bone ba ba buang le badimo, lefa e le kwa go bone ba ba loang; lo seka lwa ba batla, go tla lo itshekololwa ke bone: ke nna Jehofa wa lona" (Lefitiko 19:31).

KAROLO YA BONE:

Gantsi o fitlhela ngaka ya setswana e pega molato batho ba ba

senang molato, e re ke bone ba ba tlisitseng bolwetsi, mme selo se se tlisa dikganetsano le dikilano mo baagisaneng. Mosetsana mongwe yo go tweng Kenosi, o ne a lwala bolwetse jwa go ruruga maoto. E ne e le Mokeresete. O ne a kopa batsadi ba gagwe gore ba mo ise kokelong, mme ba gana. Ba ne ba mo gakolola go ya ngakeng ya setswana, mme a dumela a ya. Ngaka ya setswana e ne ya dirisa poifo ya batho ba lolwapa le, le tumelo ya bone mo ditlhareng tsa Setswana, gore go nne le kilano fa gare ga bone le ditlhareng tsa setswana, gore go nne le kilano fa gare ga bone le Baagisani nabo e ne e se bone ba tšentseng mosetsana balwetse, mme ba lolwapa lwa mosetsana ba ne ba dumela mo ngakeng ya setswana. Modimo Wa re, "...O rate wa gaeno jaaka o ithata" (Mathaio 19:19). Mokeresete o a bo a sa obamele ditaolo tsa Modimo fa a sa thegetse taolo e.

KAROLO YA BOTLHANO:

A re dumela tota mo Modimong e bile re O ikanya? Lefoko la One le re laola gore re seka ra dirisa boloi. Jesu O ne a re, "...Taolo yotlhe ke e neilwe kwa legodimong le mo lefatsheng" (Mathaio 28:18). Re Bakeresete ba bokoa ka gore ga re ikanye Modimo mo go tsothle tse re di tlhokang.

Mokeresete yo o nonofileng o ka ema gare ga meleko. Mo Keresete ga a tshwanela go tshaba motho ope. Modimo O na le thata godimo ga bosula. O na le thata e e fetang ya mewa e e maswe le Satane. Bakeresete ba na le Mowa wa Modimo mo go bone. Fa re ya kwa ngakeng ya setswana re a bo re tswa ka bo rona mo diatleng tsa Modimo. Re a bo re itsenya mo diatleng tsa mewa e e maswe.

Bala 1 Johane 4:1-4. Temana 4 e re bolelela gore, "...ka yo o mo go lona o mogolo go feta yo o mo lefatsheng." Modimo O tla re naya phenyo, ka gonne Mowa wa ga Keresete O mogolo thata mo go rona go feta mewa e mengwe. Se re ka se dirang ke go nna le tumelo le boikanyo mo Modimong.

MOETELEDI-PELE WA THULAGANYO:

Bangwe ba re lebile go bona fa Modimo wa rona O le mogolo.

Re utlwise bopaki jwa rona botlhoko thata, fa re ya kwa ngakeng ya setswana. E tla re batho ba re bona re ya ngakeng ya setswana, ba tla re ga re ikanye Modimo gore Oa re babalela.

Mathaio 5:16 ya re, "Fela jalo a lesedi la lona le phatsime fa pele ga batho, gore ba bone ditiro tsa lona tse di molemo, mme ba galeitse Rra eno Yo O kwa legodimong."

A re itlhatlhobeng gompiano, re bone fa re obamela Modimo mo kgang e ya go ya dingakeng tsa setswana. A re kopeng Modimo gore O re etelele pele, O re neye nonogo ya Gagwe, ka gone rona ga re a nonofa. A re dumeleng mo Modimong, re O emeleng re tiile.

NAKO YA THAPELO:

KELOTLHOKO:

Botsa basadi kaga pego ya loeto lo lo neng lo tshwanetse go iwa mo bekeng e e fetileng. A maloko a ile a etela mongwe yo o lwalang? A a ile a etela ba ba latlhegileng? A ba ile ba etela leloko lengwe le le kgelogileng?

Thulaganyo 10

Tlhogo ya Kabelo ya Boraro: MAUNGO A MOWA

Tlhogo ya Gompieno: LOUNGO LO LO GOLO KE LORATO

Temana ya Tlhogo:

"Mme jaana go sala tumelo, le tsholofelo, le lorato, boraro jo; mme se se golo mo borarong jo ke lorato" (1 Bakorintha 13:13).

MOETELEDI-PELE WA THULAGANYO:

Letlhoko lo lo golo mo dikerekeng tsa rona ke eng gompeino? Letlhoko lwa rona lo lo golo ke go nna le maloko a kereke a tota a tladitsweng ke Mowa O O Boitshepo. Re tlhoka Bakeresete ba e leng gore matshelo a bone a supa maungo a Mowa. Maungo a Mowa ke eng? Baebele e re bolelela mo go Bagalatia 5:22-23 gore, "Mme loungo lwa Mowa ke lorato, le boitumelo, le kagiso, le bopelotelele, le bopelonomi, le molemo, le boikanyo, le boingotlo, le boikgapho: dilo tse ga di angwe ke molao ope."

Fa re tladitswe ka Mowa wa Modimo, re tla nna le popego e mo matshelong a rona. Fa re ntse re ithuta maungo a Mowa mo dibekeng tse di tlang tse pedi, a mongwe le mongwe a sekaseke botshelo jwa gagwe go bona gore o na le maungo a.

Loungo lwa ntlha le le buiwang ke lorato. Baebele e bua thata ka lorato. Mo go 1 Bakorintha, Paulo o ne a re bolelela gore fa re sena lorato ga re sepe fela. Gompieno re tla ithuta kaga lorato lo Bakeresete ba tshwanetseng go nna nalo mo matshelong a bone.

KAROLO YA NTLHA:

Lorato ke popego e kgolo ya Mokeresete. Se ke sone se se dirang gore Bakeresete ba farologane le lefatshe. Jesu O ne a raya barutwa ba Gagwe A re, "Ke lo naya taolo e ntsha, ya gore, lo ratane; fela jaaka ke lo ratile, gore le lona lo ratane. Batho botlhe ba tla itse fa lo le barutwa ba Me" (Johane 13:34-35).

Johane wa Ntlha 4:7-8 e re bolelela gore, "Baratwa a re rataneng

gonne lorato ke selo sa Modimo: mme mongwe le mongwe yo o ratang o tsetswe ke Modimo, e bile o itse Modimo. Yo o sa rateng ga a itse Modimo; gonne Modimo O lorato" (1 Johane 4:7-8). Re bala gape 1 Johane 4:21 gore, "Mme taolo e, re e tshotse mo go Ena, gore, y o o ratang Modimo, a a rate le mogagabo."

Go bua ka lorato lwa Modimo ke selo se se motlhofo, mme go bua go le nosi ga go kake ga bontsha lefatshe fa Modimo e le lorato. Se se ka bontshang batho fa Modimo e le lorato ke fa bana ba Modimo ba supa lorato mo matshelong a bone. Batho ga ba kake ba bona Modimo, ba tshwanetse go bona lorato lwa Ona mo go rona. Lorato le tshwanetse go laola matshelo a rona. Se ke sone sesupo se se golo sa gore re Bakeresete. "Fa lo ratana, batho botlhe ba tla itse fa lo le barutwa ba me." Se ke sone se Jesu O se buang le rona gompieno.

KAROLO YA BOBEDI:

Lorato lo e leng loungo lwa Mowa, ke fa o rata mongwe le mongwe. Modimo O ne Wa re rata fa re ne re le baba ba One, fa re ne re santse re le baleofi (Bala Baroma 5:8-10). Jesu O ne a itsalanya le ba ba latlhlweng, diaka, bakgethisi le baleofi. O ne a rata batho botlhe ka lorato lwa Modimo. O ne a re fa A le mo mokgorong, A rapelela ba ba neng ba Mo ila. O ne a kopela boitshwarelo bao ba neng ba mmapola.

Go thata mo bathong ba bangwe gore ba rate. Batho bangwe ke baba ba rona. Ba bangwe ga ba re tseye sentle. Ba bangwe ba leka go re utlwisa botlhoko. Jesu O ne a re, "...Ratang baba ba lona...mme fa lo rata ba ba lo ratang, lo ba lo na le tebogo efe? Gonne baleofi le bone ba rata ba ba ratang le bone" (Luke 6:27 le 32).

Re tshwanetse go rata mongwe le mongwe jaaka a ntse, go sa kgatlhalesege go re ke amang. Re tshwanetse go rata bao ba re ratang, le bao ba sa re rateng. Re tshwanetse go rata batho ba lotso lwa rona, kana ba morafe wa rona kana ba mmala o o tshwanang le wa rona, le go rata batho ba ditso di sele kana merafe e sele kana mebala e sele. Re tshwanetse go rata batho botlhe ka gonne Mowa wa ga Keresete O nna mo go rona, le tiholego ya

Gagwe ke lorato.

KAROLO YA BORARO:

Lorato lo fenyha bosula ka molemo. Jesu O ne a itse fa re sa kake ra fenyha bosula fa re dirisa marumo a a bosula. Go lwantsha bosula ka bosula ke mokgwa wa lefatshe. Motho yo o tletseng Mowa O O boitshepo o tla dirisa molemo go lwantsha bosula. Se se bontsha fa lorato lo le mo mothong yoo.

Jesu O ne a re bolelela se re tshwanetseng go se dira, fa a ne A re, "Mme ke raya lona ba lo utlwanang, ke re, ratang baba ba lona, ba ba lo ilang lo ba direle molemo, lo segofatse ba ba le hutsang, lo rapelele ba ba lo gobololang. Mme ena yo o go fapholang mo lerameng lengwe, mo neele le le lengwe; le yo o go tseelang kobo, le kojana o seka wa gana ka yona. Naya mongwe le mongwe yo o go lopang; le yo o go tseelang dilwana tsa gago, o seka wa ba wa di mo lopa" (Luke 6:27-30).

Lorato lwa Sekeresete lo nonofile go feta ditshaka kana ditlhobolo. Jaanong re reng fa batho ba sa batle lorato lwa rona? Re reng fa ba sa re rate? A re ineela? Nnyaa, re tswelela fela ka gore re a ba rata. Paulo o ne a kwala mo go 1 Bakorintha 13:7-8, "Lorato, lo itshokela dilo tsotlhe, lo dumela dilo tsotlhe, lo iphapananya le dilo tsotlhe. Lorato ga o kake lwa tlhabela gope..."

Lefa re sa bone maduo ape a lorato lwa rona, re tshwanetse go tshwelela fela ka go rata. Ga re a tshwanela go ineela. Re tshwanetse go tswelela ra dumela fa Baebele e re bolelela gore lorato ke selo se se golo.

KAROLO YA BONE:

Lorato le raya o le supa ka ditiro. Re ka se nne mo matlong a rona re sa dire sepe, re tloge re re, "Ke rata batho." Jesu O ne a re, "Mme fela jaaka lo rata batho ba lo direla, le lona lo ba direle fela jalo" (Luke 6:31).

Fa re utlwa Jesu, ke fa re tsamaya mo tseleng ya Gagwe. O ne a batla batho ba ba neng ba Mo tlhoka. Gongwe le gongwe kwa Jesu O neng a ya teng, O ne a itse fa go na le batho ba ba lwalang, kana ba ba digole kana difofu kana ba ba tlhokang. Re tshwanetse go nna bofelo go lemoga se se tlhokwang ke ba re bapileng nabo.

Go motlhofo gore re tseye tsia tse di amang ba malwapa a rona le ditsala tsa rona, mme o fitlhele re lebala batho ba bangwe. Batho ba le bantsi mo lefatsheng le ba batla go nna le tsala. Ba batla mongwe yo ba ka buang nae, ba abelana matshwenyego le dikutlo botlhoko. Ba batla mongwe yo o ka ba thusang. A re batla ditsela tse re ka thusang ba bangwe ka tsone?

Letsatsi lengwe monna mongwe o kile a feta mosetsanyana mongwe mo tseleng. Mosetsanyana a belege kgaitisadi yo monnye. Mosetsana yo, o ne a tshotse borotho le matlhare a tee le sukiri, dilo tse, o ne a di reketse mmagwe kwa lebentleleng. Ka tshoganetso monna a utlwa modumo. E rile o leba kwa morago, a bona dilwana tse di neng di rwelwe ke mosetsana di ole. O ne a ema, a boela kwa morago kwa mosetsaneng, a fitlha a mo thusa go sela dilwana. Mosetsana o ne a leba monna yo, a mmotsa a re, "Rra, a ke wena Jesu?"

Re bontsha lorato lwa rona mo go Jesu, jaaka re ka le supa mo bathong ba bangwe. "Banyana ba me, a re se rateng ka molemo fela, lefa e le ka loleme fela; fa e se ka tiro le boammaaruri" (1 Johane 3:18).

MOETELEDI-PELE WA THULAGANYO:

Bakeresete ba ntlha ba ne ba itsiwa ka go ratana ga bone. A re na le lorato mo dipelong tsa rona le mo matshelong a rona? Lorato ke loungo lwa Mowa. Modimo O re naya lorato lwa One ka gone re tladitswe ka Mowa wa One.


Re ka tladiwa jang ke Mowa wa One? Re tshwanetse go lemoga fa rona re se sepe ka bo rona. Re ka se itirele sepe ka bo rona. Re tshwanetse go tla kwa Modimong, ra ipolela dibe tsotlhe tsa rona, ra kopa boitshwarelo mo go One, ra bo ra ineela gotlhelele mo go One. Re tshwanetse ra kopa Modimo go re tlatsa ka Mowa wa One. Go tsweng foo re ka dumela fa Modimo O dirile selo se.

Malatsi otlhe jaaka re tla bo re ntse re ineela gotlhelele mo Moreneng, re tla simolola go bona loungo lwa Mowa mo matshelong a rona.

NAKO YA THAPELO:

KELOTLHOKO:

A go na le lelwapa longwe lo lo tlhokang sengwe se se faphegileng mo bathong ba lo agileng mo go bone? A go na le motlholagadi mongwe yo o tlhokang thusa? Gongwe lo ka loga leano le setlhopha sa lona se ka thusang ba ba tlhokang.



Thulaganyo 11

Tlhogo ya Kabelo: MAUNGO A MOWA

Tlhogo ya Gompiano: GO TSAMAYA KA MOWA

Temana ya Tlhogo:

"Fa re tshela ka Mowa, le gona a re sepeleng ka Mowa"
(Bagalatia 5:25).

MOETELEDI-PELE WA THULAGANYO:

Mowa O O Boiatshepo ke mpho ya Modimo, e e filweng bao ba amogetseng Jesu jaaka Mmoloki wa bone. Bakeresete botlhe ba na le Mowa O O Boitshepo mo go bone. Lefa go ntse jalo, ga se Bakeresete botlhe ba ba tladitsweng ka Mowa O O Boitshepo. Ga se Bakeresete botlhe ba ba nang le botlalo le nonofo ya Mowa.

Go tladiwa ka Mowa O O Boitshepo ke eng? Go tladiwa ka Mowa O O Boitshepo, ke fa Mowa O O Boitshepo O laola botshelo jwa gago gotlhelele. Jaaka re ithutile mo bekeng e e fetileng gore re tshwanetse go ipolela dibe tsotlhe tsa matshelo a rona gore re amogele botshwarelo. Letsatsi le letsatsi re tshwanetse go ineela mo Modimong. Re tshwanetse go O obamela mo go sengwe le sengwe.

Baebele e bua gore fa re na le maungo a Mowa mo matshelong a rona, re a bo re tladitswe ka Mowa. Mo bekeng e e fetileng, re ithutile gore loungo lwa ntlha lwa Mowa ke lorato. Gompiano re tla ithuta ka dipopego tse dingwe, tse di mo botshelong jwa motho yo o tsheleng e bile a tsamaya le Mowa.

KAROLO YA NTLHA:

(Bala Bagalatia 5:22-23).

Morago ga lorato, gone mo ditemaneng tse, di re bolelela fa loungo lwa Mowa e le boitumelo. Paulo o kwadile a re, "Itumeleng ka metlha yotlhe." (1 Bathesalonika 5:16). Jesu O ne a re, "Dilo tse ke di buile le lona, gore boitumelo jwa me bo nne mo go lona, le gore boitumelo jwa lona bo diragale" (Johane 13:11). Ditaolo

tsotlhe tse di mo Lefokong la Modimo, re a di neelwa gore re tle re nne le botlalo jwa boitumelo, jaaka re rata Modimo e bile re O obamela.

E rile Paulo a ise a kopane le Jesu, e ne e le mohumi. O ne a na le maemo a a tlotlegang. O ne a na le madi le dilo tse dingwe tse dintsi. E rile fa Paulo a sena go nna Mokeresete, o ne a tlhola a iteilwe. O ne a tlhola a tsentswe mo kgolegelong. O ne a kwala fa mmele wa gagwe o ne o tletse dipadi ka ntlha ya diketane le ka go itewa. O ne a bogisega ka ntlha ya ga Keresete. Lefa go ntse jalo, pelo ya ga Paulo e ne e tletse boitumelo, mo e leng gore lefa a le mo kgolegelong, o ne a tle a opele dipina tsa Modimo tsa pako. E ne ya re a le mo kgolegelong, a kwala mafoko a, "Itumeleng mo Moreneng ka metlha yotlhe" (Bafilipi 4:4).

Mowa O O Boitshepo O O nnang mo go rona, O re naya boitumelo jo bo gakgamatsang, lefa re le mo botlhokong, kutlo botlhokong, mekgweleo, matshwenyego kana pogisego. A o raya gore o ka itumela fela lefa go ka reng ka o le ngwana wa Modimo? A o ka itumela fela ka ntlha ya gore o itse fa Modimo O go rata e bile O go tlhokomela mo metlheng yotlhe? Loungo lwa Mowa ke boitumelo.

KAROLO YA BOBEDI:

Loungo lo lo latelang lwa Mowa ke kagiso. Batho ba batla kagiso, lefa mo lefatsheng la rona gompieno go sena kagiso.

Jesu O ne a re, "Kagiso ke e tlogela le lona; kagiso ya me ke a e lo naya: ga ke lo neye jaaka lefatshe le tle le neye batho. A dipelo tsa lona di se fuduege, le gona a di se boife" (Johane 14:27). Lefa go sena kagiso mo lefatsheng, yone re na nayo mo dipelong tsa rona. Fa Mowa O O Boitshepo O santse O busa mo dipelong tsa rona, re tla nna le kagiso. Kagiso ke loungo lwa Mowa.

Mosadi mongwe o kile a bo a fafamoga ka metlha yotlhe, a khidiega, e bile a tshwenngwa ke sengwe le sengwe. O ne a re o na le Mowa O O Boitshepo. Mme e rile batho ba bona a khidiega e bile a tshwenyega, ba lemoga fa a sena kagiso mo pelong ya gagwe.

Yo mongwe mosadi o ne a na le bana ba le babedi, ba ba ileng ba

tswena ke bolwetse jwa sehuba sa mongangarelo. Bana ba, ba tloga ba a swa botlhe. Mosadi yo, o ne a hutsafala thata, lefa a ne a ntse a re, "Ke na le kagiso mo pelong ya me, ke itse fa ke tla bona bana ba me letsatsi lengwe kwa legodimong." Modimo O ne Wa mo naya kagiso ya nnete. Mowa O O Boitshepo O O neng O le mo go ene, e ne e le Mogomotsi wa gagwe.

Modimo O ka re naya kagiso, fa re O ikanya re ba re dumela gore O re tlatse ka Mowa O O Boitshepo, re tla nna le kagiso ya One mo dipelong tsa rona, lefa re ka tlelwa ke eng mo matshelong a rona.

KAROLO YA BORARO:

Maungo a mangwe a Mowa mo botshelong jwa Sekeresete, ke bopelotelele, bopelonomi le molemo.

Bopelotelele ke fa re letla ka lobaka lo lo leele re sa fele pelo. Baebele ya re Modimo O na le bopelotelele mo go rona. Lefa re sa O rate jaaka re tshwanetse go O rata, lefa re sa tsamaye mo ditseleng tsa One, le go obamela ditaolo tsa One, Modimo O tswelela ka go re rata ka bopelotelele.

Fa re le mo mebeleng ya rona ya tlhologo, ga re rate go leta. Fa re leta re fela pelo. Ka dinako dingwe, fa re dira tiro ya Modimo, re fela pelo. Re ikaelele go ineela. Baebele ya re, "Mme a re se lapeng mo go direng molemo: gonne re tla roba mo motlheng o e leng ona, fa re sa ngodiege" (Bagalatia 6:9).

Bopelonomi le molemo, go tewa fa motho a na le mowa wa go amiwa ke se se diragalelang batho ba bangwe le gore a kgona go ba direla sengwe. Go tewa go akanyetsa batho ba bangwe pele. Paulo o ne a kwala mo go Bagalatia 5:26, "A re se nne boipelafatso fela, re se ka ra rumolana, ra direlana ka bopelotshetlha." O ne a kwala gape mo go Bagalatia 6:2 a re, "Rwadisanyang merwalo..."

Fa re tletse Mowa O O Boitshepo, re tla nna bopelotelele, bopelonomi le molemo.

KAROLO YA BONE:

Boikango, bonolo, le boikgapo ke mangwe a maungo a Mowa mo botshelong jwa Mokeresete yo o tletseng Mowa wa Modimo.

Motho yo o ikanyegang, ke yo o ka ikanyang se a se buang le se a

se dirang, e bile a diragatsa se a se buileng. O ka mo ikanya, ka e bile a le boikanyego mo go Jesu ka nako tsotlhe, malatsi a beke, gongwe le gongwe fa a leng teng.

Bonolo go tewa boingotlo. Motho yo o tletseng Mowa ga a na go ipaya mo maemong a a kwa godimo. Ga a na go ipaya fa godimo ga batho ba bangwe. Ga a na go nna le mowa wa boikgogomoso. Boingotlo ke loungo lwa Mowa. Baebele e re bolelela gore, "Tuelo ya boingotlo le go boifa Jehofa ke khumo, le letlotlo, le botshelo" (Diane 22:4).

Boikgapo ke fa re kgona go laola mebele ya rona le dikeletso le dikgatlhego tsa rona. Selo se, ga re kake ra se kgona ka nonofo ya rona. Ke ka ntlha yone e, fa boikgapo e le loungo lwa Mowa. Jaaka re laolwa ke Mowa O O Boitshepo, re kgona go tshela mo lefatsheng ra itisa mo sebeng sa lefatshe.

Mo go 2 Bakorintha 6:17-18, re bala gore, "Mme ke gona, tswang mo gare ga bone, lo lomologane, go bua Jehofa, mme lo seka lwa ama sepe se se itshekologileng, mme ke tla lo amogela, ke tla nna Rraa lona, mme lo tla nna bomorwaake le bomorwadi-ake, go bua Jehofa Mothatayotlhe."

Boikgapo ke fa o kgona go laola bogale jwa gago, gore o seka wa tsenega. Boikgapo ke fa o kgona go laola loleme lwa gago le go laola dikarolo dingwe tsa mmele wa gago. Re ka kgona selo se, fela jaaka Jesu A kgona go laola dikarolo tsotlhe tse di mo go rona.

MOETELEDI-PELE WA THULAGANYO:

A re lebeng matshelo a rona. A re bona maungo a Mowa O O Boitshepo mo go rona? A Mowa O O boitshepo O nna mo go rona, a O a re tlatsa? A Mowa O O Boitshepo O busa matshelo a rona? A re letlelela Mowa O O Boitshepo go re dirisa go galaletsa Modimo?


A re akanyeng ka ga dilo tse, jaaka re tla bo re ya magaeng a rona. A re khubameng fa pele ga Morena a le esi, re ipoleleng dibe tsa rona, gore re amogele boitshwarelo le nonofo ya Modimo. A re letleleleng Mowa O O Boitshepo go laola matshelo a rona gotlhelele, letsatsi le letsatsi.

NAKO YA THAPELO:

Rapelela batho ba Baptist ba ba nang le kereke e tshwarelwa mo lelwapeng lwa bone.

KELOTLHOKO:


Rulaganya maina a batho ba o nnang mo go bone, ba ba sa bolokwang. Ba rapelele. Loga leano la go ba etela, mo bekeng e. Kopa Modimo gore O go etelele, fa o tla bo o ntse o ba etela.



"A maungo a Mowa a bonwa mo botshelong jwa me."



GUATEMALA



NORTH AMERICA

ATLANTIC OCEAN

GUATEMALA

SOUTH AMERICA

PACIFIC OCEAN


EUROPE

ASIA

AFRICA

INDIAN OCEAN

Botswana



MEXICO

BELIZE

CARIBBEAN SEA

HONDURAS

EL SALVADOR

PACIFIC OCEAN

Guatemala

• Sacapulas

• Momostenango

• Quetzaltenango

• San Martín

• Guatemala

• Santa Rosa

• Escuintla

• Champerico

• Matas de Galvez
• Puerto Barrios

Thulaganyo 12

Tlhogo ya Kabelo ya Bone: GUATEMALA

Tlhogo ya Gompieno: GUATEMALA, LEFATSHE LA
DIPHAROLOGANO

Temana ya Tlhogo:

"Bolelang kgalalelo ya Gagwe mo gare ga merafe, ditiro tsa
Gagwe tse di gakgamatsang mo gare ga ditshaba tsotlhe"
(Dipesalema 96:3).

MOETELEDI-PELE WA THULAGANYO:

Guatemala ke lefatshe le le mo Central Amerika. Guatemala e na le dithaba fela le dithaba tse di thunyang. E na le dintshi tsa mawatlle di le pedi. Le lengwe losi, lo lebile ntlheng ya lewatle la Pacific le lengwe le lebile ntlheng ya lewatle la Caribbea (bona mmepe). Go na le mafelo mangwe a a mogote, fa a mangwe a le tsididi. Guatemala e kgaogantswe ka ditlhopha di le pedi tsa batho: batho ba, ke Ma-India a Central Amerka (Ma-India a Central Amerika ga ba tshwane le Ma-India a Afrika), le Ma-Ladino.

KAROLO YA NTLHA:

Batho ba ba fetang sephato ke Ma-India a a nnang mo dikgaolong. Ma-India a, ke a a tswang mo merafeng e e farologanyeng. Morafe mongwe le mongwe wa Ma-India o na le puo ya one, diaparo, setso le ditumelo tsa one. Ma-India a, a tshela ka tsela e e tshwanang le e e neng e tshelwa ke borрабо mogolo. Bontsi jwa bone ga ba itse go bala le go kwala. Ma-Ladino a akaretsa batho bangwe ba Ma-Spanish, merafe e e tlhakatlhakan-yeng, le Ma-India a a sa tlholeng a latela botshelo jwa Se-India. Gantsi o fitlhela Ma-Ladino e le batho ba ba rutegileng, ba kgona go bua ya semmuso ya lefatshe leo, ebong Se-Spanish. Ke bone ba ba busang, gape ke bone ba ba nang le ditiro tsa kgwebo.

KAROLO YA BOBEDI:

Ka semmuso, lefatshe la Guatemala ke la tumelo ya kereke ya Roma. Ma-Ladino ba itsaya jaaka batho ba kereke ya Roma, lefa bontsi jwa bone ba sa golagana ka gope le Jesu. Ma-India one, a tlhakanya tumelo ya Roma le kobamelo ya dilo tsa tlhologo. Ma-India ba ne ba amogela molaetsa wa lorato le poloko ka Jesu. Bontsi jwa bone, bo ne ja ineela matshelo a bone mo go Jesu.

Mosupi wa ntlha wa ga Keresete wa Baptist, e ne e le motsamaisa-sekepe yo o neng a bidiwa Frederick Crowe. Ka dingwaga tsa bo 1840, o ne a tsamaya motse le motse a rekisa Dibaebele e bile a bua molaetsa wa Modimo o o mo Baebeleng. E ne ya re morago a lelekwa mo Guatemala, ka ntlha ya thuto ya gagwe.

E ne ya re morago ga dingwaga tse dintsi, goromente a letlelela Bakeresete go supa kaga Keresete. Setlhopho sa badumedi sa simolola go dirisa dikwalo tsa Baptist Spanish Publishing House. Ba ne ba lemoga fa ditumelo tsa bone di tshwana le tsa Ma-Baptist. Ka jalo ba simolola kereke ya ntlha ya Baptist mo Guatemala. Dikereke tse dingwe tsa tlhoga ka ntlha ya badumedi ba ba neng ba ya lefoko le lefelo ba supa kaga Keresete.

KAROLO YA BORARO:

Ma-Baptist ba Guatemala ga ba lemoge go gola ga dikereke le maloko fela, ba lemoga fa ba gola le mo moweng. Se se supiwa ke matlhagatlhaga a bone mo efangeleng le mo go goleng ga kereke. Dikereke tsotlhe tsa Baptist tse di mo Guatemala di ikemetse ka nosi. Thuto ya boeteledi-pele e botlhokwa thata mo Guatemala. Go na le dikolo di le pedi tsa go ruta Baebele. Sekolo sa Baebele sa Baptist mo Guatemala (Baptist Theological School) se ruta batho go tswa baruti le go nna baeteledi-pele. Dikolo tse dingwe tse pedi ke tse di diretsweng go ruta Ma-India a a mo dikgaolong, boruti jo bo sa tsenelelang. Dikolo tse, ke tsa dithuto tse di tsayang lobaka lo lo khutshwane.

Letlole la Dibuka tsa Baptist (Baptist Book Store) le thusa go anamisa Mafoko a a Molemo ka dibuka tsa Sekeresete. Di-thulaganyo tsa malatsi otlhe tsa seromamowa le TV di na le tiro e e

botlhokwa thata ya go supa, ka gonne mongwe le mongwe o kgona go reetsa seromamowa. Lefa e le mo mafelong a a kwa tengnyana teng mo dikgaolong, batho ba teng ba na le diromamowa. Batho ba le bantsi ba ithuta kaga Jesu, ka go reetsa ditshameka theipe tsa melaetsa le dikwalo tsa Mafoko a a Molemo. Go tshameka theipe go thusa Ma-India a a sa kgoneng go bala le go ithuta dikwalo tsa Mafoko a a Molemo le boammaaruri jwa semowa.

KAROLO YA BONE:

Rre Tala o baka Modimo, ka O falodisitse ene le ba lelwapa la gagwe thoromo ya lefatshe. Maribela a ntlo ya gagwe ke one fela a a neng a sala a eme, morago ga thoromo ya lefatshe. Pele ga thoromo ya lefatshe, go ne go tle go tshwarwe dithuto tsa Baebele mo legaeng la gagwe, masigo a mabedi mo bekeng. Bakeresete ba ne ba tle ba tlise ditsala tsa bone tse di sa bolokwang gore ba ithute Baebele le bone. E rile morago ga thoromo ya lefatshe, Rre Tala a letlelela gore go tshwarelwe tirelo ka fa tlase ga maribela a ntlo ya gagwe, ka e ne e le one fela a a neng a setse. Jaaka Rre Tala le morongwa wa Modimo ba ne ba ntse ba dira dipaakanyo tsa dikopano, Mme Tala o ne a ba tlišetsa kofi le dinkgwe. Mme Tala o ne a apeetse dijo tse ka fa tlase ga setlhare, ka gonne o ne a sa tlhole a na le ntlo. Rre le Mme Tala ba ne ba ikaeletse go aga sesha ntlo ya bone ka bofelo, gore batho ba nne le lefelo le le siameng le ba ka kopanelang mo go lone go obamela Modimo le go ithuta Baebele.

MOETELEDI-PELE WA THULAGANYO:

Dikereke tse di tshwarelwang mo malwapeng a batho (ke gore diphuthago tse di nnye tse di phuthegang go tla go ithuta Baebele, kabalano, le go supa) di naya batho ba Guatemala sebaka sa go utlwa kaga Jesu. Ka gonne malwapa otlhe a tsena dikereke tse, go ka nna thata mo go bone go tsamaya sekgele se se telelele ba ya kerekeng.

Lefa baagisani le ditsala di gana go ya kerekeng, lefa go ntse jalo ba dumela go tla kwa matlong a, a diphuthago. Ka jalo, mo Guatemala, fela jaaka mo mafelong a mangwe a mantsi, Mafoko

a a Molemo a abelanwa ka tsela e e tshwanang fela le e re balang kaga yone mo go Ditiro.

Rapelela dikereke tse di tshwarelwang mo malwapeng kwa Guatemala. Rapelela ditlhopha tse di mo Botswana, tse di tshwarelang kereke mo malwapeng. Modimo O segofatsa ditlhopha tse. Rapelela gore botlhe ba malwapa ao ba ba tsenang tirelo, ba bolokwe.

NAKO YA THAPELO:

Rapelela dikereke tsothe tsa Baptist mo Botswana. Kopa Modimo gore O di thuse go gasa Mafoko a a Molemo mo setshabeng sa tsone.

Thulaganyo 13

Tlhogo ya Kabelo ya Bone: GUATEMALA

Tlhogo ya Gompieno: DIKEREKE TSE DI TSHWARELWANG
MO MALWAPENG KWA GUATEMALA

Temana ya Tlhogo:

"Mme ka malatsi a otlhe, mo tempeleng le mo ma ga bone, ba
se ka ba khutla go ruta, le go rera fa Jesu e le Keresete"

(Ditiro 5:42).

MOETELEDI-PELE WA THULAGANYO:

Mo Kgolaganong e Ntsha, re bona ditlhophha tsa badumedi di phuthegela mo malwapeng go tla go abelana, go rapela, go supa le go ruta efangele mmogo. Mo ditoropong le mo metseng ya dikgaolo ya Guatemala, go na le ditlhophha tse di ntseng jalo tse di kopanelang mo malwapeng. Bontsi jwa dikereke tsa Baptist di simolotse ka tsela e e ntseng jalo, e le ditlhophha tse di kopanelang mo malwapeng.

KAROLO YA NTLHA:

Ka tlholego, batho ba Guatemala ba botsalano. Ba amogela baeng ka metlha yotlhe mo malwapeng a bone. Ba bofelo go amogela baeng. Ka jalo, go nnile motlhofo go simolola dithuto tsa Baebele, dikabelano, le go abelana go supa ga Sekeresete mo malwapeng. Ka gonne go gana taletso yo go tla kwa lelwapeng la motho yo mongwe, go tsewa jaaka makgakga, bontsi jwa ba ba neng ba sa dumela, ba ne ba lalediwa go tla kwa malwapeng a badumedi go tla go utlwa molaetsa wa Mafoko a a Molemo. Ka jalo, molaetsa wa lorato lwa Modimo le poloko di anamisiwa ka tsela yone e.

Kereke ya Damascus Baptist e ne ya simololwa mo lelwapeng la ga Daniel Lopez. O ne a laletsa ditsala tsa gagwe le baagisanyi nae, gore ba tle kwa lelwapeng la gagwe, go tla go utlwa dipina tsa Mafoko a a Molemo le molaetsa. Moragonyana, setlhophha se sa

gola, sa se ka sa lekana go tsena sotlhe mo kamoreng ya bonno. Ka jalo, a lomaganya ntlo ya bonno le tse dingwe gore e nna ntlo e nngwe-fela gore batho ba bone bonno jo bo lekanyeng jwa kopano. Setlhopha se sa tswelela sa gola, mo e neng ya re morago ba tlhoka kamore e ba ka kopanelang mo go yone mo ntlong eo. Ba ne ba ipopa go nna phuthego, ba reka setsha, mme ba aga ntlo ya kereke.

KAROLO YA BOBEDI:

Eusebio o ne a tsena kereke nngwe ya Baptist e e neng e le dimaele di le dintsinzana, e le mo toropong. O ne a nna le mmaagwemogolo mo motsaneng mongwe mo kgaolong. Ba ba neng ba nna mo motsaneng oo, ba ne ba rata go utlwa kaga Jesu, mme ba ne ba sa itse puo ya Se-Spanish. Ka jalo, Eusebio o ne a simolola dithuto tsa Baebele mo lelwapeng la gagwe ka puo ya bone. E ne ya re mo dibekeng tse di seng kae moruti a tla, mme ga dirwa ditirelo tsa tsoseletso. Batho ba ne ba rata go opela. Ka gone ba ne ba sa itse go bala, Eusebio o ne a tle a opele dipina gantsi ntsi, a di boelela, go tsamaya batho ba di tshwara ka tlhogo. Ba ne ba ithuta ditemana tsa Baebele ka tsela e e tshwanang le yone e.

KAROLO YA BORARO:

Depaz o ne a dirisa fensetere ya ntlo ya gagwe go baya mo go yone dipampiri tse di neng di bolela se se neng se diragala kwa kerekeng ya bone. Kereke e, e ne e ka tsaya lobaka lwa metsotso e le lesome le botlhano, fa o ya kwa go yone o palame bese, go tswa fa lwapeng la ga Depaz. Fa a ne a feletswe ke dipampiri tse dingwe, tse a neng a ka di baya, one a tle a beye e e neng e re, "Keresete ke Ene fela tsela." Mme e ne e tle e re fa bana ba ntse ba lebile dipampiri tse, a ba neye dipampitshana tse di buang kaga Modimo, a ba bolelele gore ba tle ka letsatsi la Matlhatso, ba tle go bona 'sengwe se se faphegileng.' O ne a simolola ka go ruta bana ba le bofera-bongwe dipolelo tsa Baebele. E ne ya re moragonyana, ga tla bana ba le bontsi jo fa gare ga 50 le 60 ka Matlhatso mangwe le mangwe. Batsadi ba bo ba simolola go ya go

bona se se ka bong se kgatlha bana. Ka jalo Depaz a simolola dithuto tsa bagolo tsa Baebele mo malwapeng a mangwe. Gompieno o tshwara dithuto tsa Baebele tsa bagolo ka Matlhatso bosigo, a tshware tsa bana ka Laboraro bosigo. O tshwara tse dingwe dithuto tsa Baebele tsa bagolo ka Labotlhano bosigo, a tshware tse dingwe di le pedi tsa bana ka Matlhatso. Ene le ba lelwapa la gagwe ba ya kerekeng ya bone ya Batania Baptist ka Tshipi, ka Labobedi le ka Labone bosigo bongwe le bongwe.

KAROLO YA BONE:

E ne ya re ka nako e go simolotsweng go bolelelwa Ma-India a Ma-K'erchi a a nnang mo kgaolo ya Pocola kwa Guatemala, Mafoko a a Molemo. Ga bo go le monna mongwe go twe Ignacio, yo o neng a ila badumedi e bile a ba bogisa. O ne a tle a ye kwa magaeng a bone, a fitlhe a tsholole dijo tsa bone. O ne a rata bojalwa e bile a le setlhogo.

Ka letsatsi lengwe, e ne ya re Ignacio a sena go tshapelwa, a tsena mo lelwapeng la mongwe wa badumedi. O ne a fitlha a senya segoagoe mo go maswe, ka go se thuba ka logong lo lo kima lo a neng a le tshotse. Tiragalo e, e diragetse fela morago ga ngwana, fa phuthego ya Pocola e ne e intshitse madi go reka segoagoe se, gore batho ba ba kwa ntle ba kgone go utlwa molaetsa wa Mafoko a a Molemo. Badumedi ba ne ba utlwa botlhoko thata, ka ntlha ya tshenyo e. Mme ba ne ba sa batle gore Ignacio a isiwe kgolegolong. Se ba neng ba batla fela e re e le gore a duele segoagoe sa bone. O ne a dumela go ba duela. O ne a rekisa kgomo mme a ba duela. Go feta dilo tse tsotlhe, badumedi ba ne ba batla gore Ignacio a itse fa Modimo O mo rata, O abileng Keresete go swela dibe tsa gagwe.

E ne ya re morago ga beke, Ignacio a amogela Keresete jaaka Mmoloki wa gagwe, mme ga nna le boitumelo jo bogolo thata.

MOETELEDI-PELE WA THULAGANYO:

Batho ba Guatemala ba ne ba nna le dinako tse di bokete. Mo dingwageng tse di seng kae tse di fetileng, batho ba le bantsi ba Guatemala ba ne ba swa ba bolawa ke thoromo e kgolo ya lefashe.

Dithoto le tstone di ile tsa senyega fela thata. Mme kotsi e kgolo e, e ne ya bula dikgoro tse dintsi tsa go supa kaga Sekeresete. Ga ba a ka ba aga sesha malwapa a bone fela, mme bontsi ba agile sesha matshelo a bone mo go Jesu Keresete.

Rapelela Bakeresete ba ba mo Guatemala jaaka ba ntse ba supa kaga Jesu. Rapelela batho gore Mowa O O Boitshepo O bue mo dipelong tsa bone, O ba senolele dibe tsa bone, le gore ba itse fa ba tlhoka Mmoloki.

NAKO YA THAPELO:

A Modimo O batla gore o simolole go supa mo go faphegileng kaga Jesu mo lelwapeng la gago? Phuthego ya lona e ka thusa jang batho bao ba sa itseng go bala? Gakologelwa — Modimo O batla re abelana Mafoko a a Molemo a ga Jesu Keresete le mongwe le mongwe!

TEMANA YA TLHOGO YA BASADI BA BAPTIST

"Gonne re badiri mmogo le Modimo: lona lo temo ya Modimo, lo kago ya Modimo" (1 Bakorintha 3:9).

SEFELA SA BASADI BA BAPTIST

Tlang Basadi Bolelang

1. Tlang basadi bolelang.
Botshelo Moreneng
Binang botlhe
Kreste Wa phatsima
Kreste Yo 'tsogileng
Krest' O rwesang sedi
Obamelang.
2. Tlisang bana botlhe
Le banyana botlhe
Lo baruteng,
Batho ba lapileng
Le balwetsi botlhe
Ba ba mo lefifing
Rapelelang.
3. Lo direng ka...thata
Opelang bosele.
Tshelang rato,
Naledi tse kganyang
Mopelong tsa lona,
Tsoswang ka lorato,
Solofelong.
4. Fa tshimo ya poloko.
'Tla' 'ngwelwa Morena
Mo motsweding,
Wa Kreste Mmoloki
Yo O galalelang
O nayang botshelo,
Bosakhutleng!